

BWÀKABUULWIBWÀ, NSHAPITÀ

MWINÁYÌ CITÙPÀ I



Amen. Mukalenge àtumbè. [Katùpà kàà mukàbà wa méyì munda mutupù—Muf.] . . .-nkàâyendè. Ngeela meeji ne ki lwidì lwà bantu bààbûngì ndwòlò alu. Mbimpè byà kacya, wèwè mwakunyàányi wa bakàjì udi kwaka wàwa, citùminu cyà ndekeelu aci. Ndi bushùwà ncyányisha be. Nènku tudi . . . balwè mu dilòdòlò dyà Cidimu Cipyacìpyà ncyèna ngeela meeji ne udi mufwànyine kwimba cingà cintu citàmbe bwimpè, anyi citàmbe kukumbànyine bwà dilòdòlò edi to.

² Mbimwèke ànu bu ne tudi tubanga cidimu bimpè; uh-huh, pambèlu mpimpè ne pàdì nêjè ne patotàkàne, ànu menemene mutù kuulu kwà Indiana mu cikondo cyà cidimu eci. Pa nàнку nwènù bàdì bafùmìne ku Georgie ndi nnumòna apa, ne bàà mu Ohio mwàmwa. Mpindyewu, Mwanèètù Dauch, wèwè ne Mwanèètù wa bakàjì Dauch nudi bamanyè mùdìbi, bu mùdìbi byà mwomùmwe ne mu Ohio. Nènku . . .kàdi, tuyàaya mu Buloba mwikala kamùyì nànsha cìmwè cyà ku byòbi to. Uh-huh. Ki bwalu abu's.

³ Edi's ndilòdòlò dyà Cidimu Cipyacìpyà, mulààdilu wàci. Nènku, mu bushùwà bwà bwalu, muntu yònsò ùdi ne dilaya difùnda mwaba awu ne mucipu uwìkala ne cyà kwenza bwà Cidimu Cipyacìpyà, pashìishe pàmbà ditùkù dyà màalaba kujika neyìkale minyangàkàjìibwe yònsò. Nàнку awu, nudi bamanyè's, nudi nubuulula dibeji dipyadìpyà, ne pashìishe nwalukila dindà didì dilonda, nucyènzulula kàbidì.

⁴ Kàdi kùdi ànu cintu cìmwèpelè cìndì—cìndì muswè kwamba, ne ciine aci ncyà bwena cyàkamba Mùpostòlò Pòlò ne: “Tupwa mwoyi bintu bidì bimane kupita abi, bilemà byànyì byònsò ne bintu byònsò bìndì mwenze, ndi ndwijakaja mutàngile ku cimanyinu cyà dibìikila ditumbùke dyà ku dyulu mu Kilistò.” Aci's ki tunynganyinga tùmwe tùndi naatù ntwà bilèmà byànyì bwà cidimu cishààle, ne citùpà cishààle cyà nsòmbelu wanyì, nènku ndi ànu mMulòmba ne didipwekesha dyònsò ngàsà bwà kulwijakaja mutàngile ku cimanyinu cyà dibìikila ditumbùke dyà ku dyulu. Ndi mutwìshìibwe ne aci ki bujaadiki bwètù—bwètù bònsò, tudi bafwànyine kudyùmwwa mùshindù awu.

⁵ Mbibi be mùdici dilòdòlò dibi dyà mùshindù ewu ne—ne bantu kí mbapete mwà kulwa. Ki mèmè kubìikila Mwanèètù Neville, ncìvwa nànsha mumanyè ní ùvwa mwà kufika kaaba aka anyi to. Ki dibà adi Mwanèètù Skaggs kulwaye, wa bwalu mmufùmìne lwà mu Kentucky mwàmwa mùdi nêjè mwicikile

metre umwe anyi bipicile apu muntwamu. Nànku awu. . . Anyi ne: “Byàmba kwikala *nènku's*,” mwàkambaye, ki kukèngelabi ne cidimè kampànda amùkokè misangu yàbùngì ne kumubàndisha lwà ku kakùnà ne katumbà. Nènku ki mèmè kudyàmbidila ne: “Èè, pùikalabi ànu byàlà bibìdi anyi bisàtù, kabyèna ne bwalu to, uh-huh, pàdibi ànu nànku awu.” Kàdi njila yìdì mímpè mwà kwendelamù ne bantu bwònsò bàdi bèndelamù.

⁶ Mpindyewu, mu bushùwà bwà bwalu, dilòlò edi ndilòlò ditwàtèèleja mìshindù ne mìshindù yà bambi, bashiilèshiiilàngàne bàdi balwe. Nènku pàmwàpa nebàtùngunuke ne kulwila mu bitùpà bishiilèshiiilàngàne dilòlò edi, too ne mundankùlù. Ngeela meeji ne nebàsòmbe ne kutàngila ní. . . bwà Cidimu Cipyacipyà kuya. . . kutwàdija, ne cikùkulu aci kushiyaci kaaba. Nènku pa ciibidilu bàtu bàbiikila bantu ku cyoshelu ne bàsambila ne—ne benzela Nzambi malaya ààbò ne benzulula malaya ààbò—ààbò.

⁷ Mèmè kwambila Mwanèètù Neville. . . Ki mèmè kumubiikila bwà kumòna ní ùvwa ùlwa. Mèmè kwamba ne pùikalaye kàyì mulwe to, nènteete bwà kutungunuka ne mwànyì pàànyì mwònsò. Ne pashiiishe bu yéyè kàyì mwà kufika mwab'ewu maalabà mu dindà to, mòna's, ndi mufwànyine kutungunuka ne kwenza cyònsò cìmvwà mwà kwenza pùikalàye—pùikalàye kàyipu apu. Nènku mvwa mumwambile ne mvwa ne cyà kuteeta dilòlò edi, ngeela meeji ànu mwà kwenza diyiiisha dyà tusunsa tutwe ku dikumi ne tùtaanu, anyi cintu kampànda. Nènku, tudi tumòna ne nudi ne bambi bakwàbò bààbùngì basòmbe mwab'ewu, bindile.

⁸ Nànku mvwa. . . ndyambidila ne mvwa mwà kutwadija ne kutungunuka ànu mu Mukàndà wà Bwàkabuulwibwà ewu, kupweka ànu naawu, kwangata nshapitá mwi'4 mpindyewu, kubangilapù. Kàdi twètù katùyì bamujikije cikondo eci, cikondo cìdì cilonda netùtungunukepù. Pashiiishe kuya ku mwi5, ne mwi6, nènku ànu ne mwètù mwònsò. Mukalenge àtùkwàcisheku bwà twètù kumujikija.

⁹ Ndi muswè kwamba, kumpàla kwà twètù kutwadija, ne kùvwa. . . mvwa ne dikùmbudiibwa kwènji katancì kakesè dyà kùdì—dyà kùdì. . . Mwanèètù Drummond Thom ne mukàjèndè. Ewu ntatwèndè ne mamwèndè bàdi basòmbe kaabà aka dilòlò edi aba. Nènku mbafùmineku ku dyalukila ku Àfrikè kuvwabo munkaci mwà kwenza masangisha manène à disùngila misùukà ne masangisha à dyondopa dyà kùdì Nzambi. Inàbànza mutekète ewu wàkaya nendè, ngeela meeji, kwà kakwèndè mujkàjì, dínghà ditùkù, ne mwikàle ne disangisha dyà mu bùlokò, ne bangènzàmpèkààtù kulwabò kùdì Mukalenge, ne bikwàbò byònsò. Bivwa ànu bilenga be mùshindù ùdì Nzambi ùkwàta mudimu ne babàke batekète abu. Mpindyewu bàdi mwab'ewu mu Àmèrikè bwà katancì kakesè bwà kwenza mudimu kampànda wa butangadiki.

¹⁰ Piikala ní nganyi wa kunùdi nwénù bampaasàtà...ndi muswè kufùndila Mwanèètù Drummond...Drummond, mémè, èyowà, ntu ncyòmpakaja dínà adi dyònsò. Bwà cinyi kavwaku ànu mwà kwangata dínà dímpe dyà mu Anglais ne kupwa adi mwoyi? Twánjibi kumupééshe nombà kampànda, cinùtù nwamba aci, bwalu ncyèna mwà kukòòkesha aci to, to. Ncyèna ngeela meeji ne cyàbibìdì cyètù cìdì mwà kukòòkesha to. “Drummont,” ngeela meeji ne, ki mùshindù mujaalàme unùdi nudishindumuna; ne Mwanèètù wa bakàjì Charlotte. Piikala ní nganyi wa kunùdi muswè kubààkidila, ndi bushùwà muswè kubuumvwa babwele mu èkèleeziyà wenù.

¹¹ Inábànzà awu, Mwanèètù wa bakàjì Charlotte ewu, ùdi ànu mwànà cyanàànà. Yèyè ùvwa ufila bujaadiki kuntwaku kukaadi katanci, kùdì Meda, bwà dilabula òvwaò bapìcìle mu Àfrikè, kàdì ndi nnwambila ne cìvwa...Billy, cyàkatùvùlwija bikondo byà kale abi kàbìdì; byenze bu kwakula kwà Afrikaans. Nènku mvità mmitùngùnùke kuntwaku ànu mùdiyi mwaba ewu emu.

¹² Piikala ní nganyi ní nganyi muswè kwakidila Mwanèètù Drummond bwà...ne Mwanèètù wa bakàjì Charlotte, bwà kampanyè mu èkèleeziyà wendè, pawikala muswè, ùbìikile ànu Mwanèètù Tony Zabel kwàka ku MELrose 7-3945. Panwikala baswè kuyifùnda, bàmwè bàà ku nwénù bambi, ndi bushùwà nnwambila bwà Mwanèètù...Bwalu's mmuyiishi mwimpè, nsongààlùme wa meeji matòòke, udi bulelèlè ukèngela kumutwisha mabòkò, bwà kubangilaye mwaba kampànda. Kàdì yèyè kèna ne bwowà to, nsongààlùme mwimpè, ne ntu mumunange bikolè be. Mpindyewu, nwavùluka, MELrose 7-3945. Nènku nènshiye karta kakesè aka mwab'ewu, bwà ne bu nwénù...Aci ki karta kààbò, nènku nwénù kanùyì bakùmbàne mwà kufùnda nombà awu to, èè, nudi mwà kulwa kukangata, anyi dìbà kàna dyònsò nàka paanyimà pàà mpùngà wa pankaci udi utàpulula masangisha mashiilèshiiàngàne dilòòlò edi. Nènku kwangata nombà wabò ne kubàbìikila panwikala baswè bwà kubààkidila mu yimwè yà ku èkèleeziyà yènù bwà disangisha kampànda, anyi muntu kampànda unùdi bamanye ne mmufwànyine kubààkidila, bwalu bàdì munkaci mwà kwenza masangisha à bukèbikebi mu Àmèrikè mujimà emu.

¹³ Aci kì mbwalu bwà dikèma anyi? Padìbi bikèngela bwà Àfrikè àtumè baamisiyònère muneemu mu Àmèrikè emu's! Muneemu ki mwaba ùdi ùkèngela kulwabo, muneemu mene, kutàmba mùdìbi kwaka nàka.

¹⁴ Nànku mbanganyì bàdì ne disànkà ne disànkishiibwa bwà ne Mukalenge mmunulaminyine mu cidimu cikwàbò? Nènku ki twètù aba, twenda tufika ku ndekeelu kwà njila. Ne tusambila bwà ne Nzambi àtùfwileku luse ku mpèkaatù yètù yònsò ne mapangila ètù.

¹⁵ Mpindyewu, ndi muswè kwamba nùnkù kumpàla kwà mémè

kubanga. Ndi njingila, muntu ne muntu wa ku nwênù bwônso, cidimu cipyacipyà cyà citàmbe ditanta ne cibènèshùibwe ne cyà makàndà à mubidi cîndî mwà kunùjingila. Nzambi ìkale neenù! Swâyi nukole mu byônso mu mubidi, ne mu nyumà, ne mu mpetu, ne mu bintu byà ku byanza. Byônso bidì Nzambi mwà kunùtwadila, ndi ndòmba bwà Yèyè kubyenza.

¹⁶ Mpindyewu mmémè ewu ntwadija cidimu cipyacipyà, mémè mwine, ànu Nzambi ki udi mumanye cidì cindile mu cikondo cìlwalwà. Nènku bikèngela twangate mapàngadika ètù. Tudi ne byônso byètù. Mwanèètù Jim, kuntu kwàka, ukàadi mubilongolole mpindyewu, bwà mabiikila ne bikwàbò byà mu buloba bujimà, byà buloba bujimà; bwà kumòna mwaba wàtùlombola Mukalenge awu. Nènku ndi bushùwà ndòmba masambila ènù nwênù cisàmbà, bwà kusambila ne mwoyi wènù wônso bwà Nzambi kùitabikù bwà mémè kulombodiibwa mu mùshindù mubì to. Ndi—ndi...bwà mu byônso bìndiku muswè kwikalà, nkwikalà ne meeji matòòke ne kubenga kwikalà mulombòdiibwe bibì. Nènku mpindyewu, mvwa mupicile mu cidimu cìmpè.

¹⁷ Misangu yàbùngì, bantu bàtu bùmvwa maalù bibì. Nènku pàdìbo bàmba ne: “Mwanèètù Branham, udi—udi...kucyena uya mu myaba mùvwà ne ciibidilu cyà kuya to, ne bu mùdì bambi bakwàbò aba benza, ne biikale ne byônso...” Ntu—ntu muyiile cintu kampànda, ncyà kuyiila dileesòna dyà mu Bible ne dyà kùdì Mukalenge wètù, dyà ne Yesù kàvwa mwena madìleeji to. Yèyè—Yèyè kàvwa naawù to, Yèyè kàvwa ne nsòmbelu wa madìleeji to. Nwamònu’s, Yèyè—Yèyè kàvwa mwena madìleeji to, nànsha kakesè. Nènku ncyèna ngeela meeji ne bayiidi Bèndè bàvwa beena madìleeji nànsha. Kacya kabàtuku badyenze beena madìleeji nànsha.

¹⁸ S’ki mwaba awu ùndì ngeela meeji ne tudi twela dikùpà leelù ewu, (Pàmwàpa cidì ànu mmwènenù wanyì mémè nkààyanyì.) wa ne, pàdìbi bikèngela bwà twètù kwela bipungipungi bwà bwalu kanà bwônso, nudi bamanyè mùdì bwalu’s, ndi ngeela meeji ne bìdì bitàmba kumwèka ne mbikàsa pamutù pà cintu cyà cijila.

¹⁹ Nuvwakù bamòne mu dilwa dyà Mukalenge, aba bààkaMwakidila bushùwà anyì? Ùvwa Simèònà, muntu nànsha umwe kàvwakù mwanjì kuumvwa cintu nànsha cìmwè pa bwalu bwèndè to, kàdi ùvwa mwindile Mukalenge. Mpofo Annà, mu ntempèlù amu. Yone Mubàtiji, mu cipèèla. Ne aba...

²⁰ Yone wàkaya mu cipèèlà pàvwaye ne bidimu citèemà, kààkamwènekakù kàbìdì to too ne pààkakùmjàyè mvùla makumi àsàtù; mu cipèèlà amu. Ne bantu bu aba bààkiitabuujà mu musokoko, kàdi kushààla bapwekèle, bàvwa bindile dilwa dyà Mukalenge. Kàdi kabàvwaku beela mpungi bwà masangisha ààbò ne bikèngela bwà kubitèèkabù pa bimanyinu binène

nànsha (“Dîbà! Cikondo!”) ne—ne ku bisanji byà bindidimbi ne bikwàbò byònsò. Abi mbimpè bwà aba bàdi baswè kucyenza mùshindù awu, kàdi, bwànyì mèmè, aci kacyèna cìmwèka bu cyà Kilistò to.

²¹ Ndi mumanyè ne musangu kampànda bânà Bààbò kuMulondela, bàmba ne: “Wèwè ewu wenza bishimà ne bikwàbò ebi, cyÛdi kùyì uyiila ku—ku Yelusàlèmà ncinyi? Nènku netùye ku difestò dyà Paasàkà, bìikidisha Kaayifà mwakwidi munène, ne bwònsò abo, ne ùbàmanyisha. Ûbyenzèlà kumpàla kwàbò mùshindù awu, bwà kumònabo byenzedi Byèbè. Nènku mpinyewu, wamònu’s, cyÛdi wenda ukùtakeena ne musùmbà wà balobi, ne bikwàbò, ku musulù kwaka, ne musùmbà wà bantu bashààdile ncinyi? Ncinyi. . . Ncinyi cyÛdi kùyì ujuukila apa bwà kwenza ne bàà pa buloba bàcìmòne?” Nwamònu anyi?

²² Yesù wàkamba ne: “Dîbà dyènù dîdikù misangu yònsò, Dyànyì dîbà kí ndyanji kulwa to.” Uh-huh. Nwamònu anyi?

²³ Yone wàkadiku musangu kampànda. . . Yone Mubàtiji, Mi—Mifundu mmyakùle bwà dilwa dyèndè. Myámbe ne: “Pààlwàye, ne. . .” Mòna’s, Yeshàayi wàkamba, bidimu bitwè ku nkàmà mwandamutekète ne bìbìdì kumpàlà kwà kulediibwayè ne: “Nekwikale dîyì dyà kampànda wela lubilà mu cipèèlà.” Ne kwamba ne: “Mikùnà yònsò neyitumpike bu twànà twà mikòòkò, mabèji ònsò neàtuutè bikàshi, myaba mitùmbùke neyìpwekeshiibwè, ne myaba mipwekele neyìbandishiibwè.”

²⁴ Bipròfetà byà mùshindù awu! Nudi nwela meeji bishi bwà bambi bàà ditùkù adi. . . Pààkangatàbo Cyòci aci, bàvwa ne cyà kwikala bàmbe ne: “Ekèlekèle! Pààlwà mupròfetà munène awu, bantu bwònsò nebàmumanyè. Nzambi neàtùululè bipooyì byà dyulu, tujila twà Dyulu netùpwekelelè pànshì, ditempu dyà kapyà nedìpweke pànshì, musùmbà wà banjèlò mumwele lwàci wènda ùpweka nendè pa buloba.”

²⁵ Pààkalwaye, ùvwa muyiishi wa kale wa kwìsù kushitákane ne cipese cyà cisèbà cyà mùkòòkò cidijìngila mu cifùka, mwikale ne cipese cyà ciseba citenga bu mukàbà. Pàmwäpa kàyìku mwòwè màyi to; mu ngondo yònsò yisàtù anyi yinaayi. Mu cipèèlà mwàmwa, ùpatukamù, wimana mu bitoci, bimushikidile ne mu binù, munkaci mwà kuyiisha ne: “Nyingàlalaayi, bwalu Bukalenge bwà mu Dyulu bùdi pabwìpì!” Yèyè kàakayakù mu bimenga to. Muntu ní nganyi yèyè muswè kumutèèleja, ùvwa ùpatuka ùlwa ku Yadènè bwà kumutèèleja, aba bàdi baswè abò. Cyàkenzàye ncinyi? Wàkanyukusha ditùnga dijimà, wàkanyukusha buloba.

²⁶ Kùdi dinyukishiibwa dìdì munkaci mwà kwenzeka dìdì bantu kabàyi bamanyè kantu nànsha kàmwè to. Pààkalwa Yesù, Yèyè kààkaDileejakù munkaci mwà bantu banène abu to. Wàkalwa kùdi Bèndè, Wàkalwa kùdi aba Bàvwà baMwindile. Ki

mwaba ùdi dinyukishiibwa dilwila awu. Ki cìdiYe wènza leelù ewu. Nyumà Mwímpè ùdi ùlwa kùdi aba bàdi Nzambi mubiikile. Kùdi dinyukishiibwa dinène munkaci mwà Basungula. Cintu cinène, cyà bukolè cidi munkaci mwà kwenzeka, kàdi bàà pa buloba kabèna bamanyè kantu nànsha kàmwè pa bwalu abu to.

27 Bàdi beela meeji ne, cintàkanyi cinène cìdi cikoka ntema eci, ne tudyòmbà twà buloba bujimà, ne tèlèvisiyò, ne nzùbu yà yiyiila milliyò yà ndola, ne bikwàbò byònsò, ne abi ki bintu binène byà luumù. Aci ndikutakana ku mèsù kwà Nzambi. Nzambi kàtu utàngila bintu binène to. Cidi muntu ùbiikila ne “ndikutakana,” Nzambi ùdi ùcibiikila ne “Ncinène”; ne cidi muntu ùbiikila ne “ncinène,” Nzambi ùdi ucibiikila ne “ndikutakana.” “KuMusànkishabi, ku dikutakana dyà diyiisha, bwà kusungila aba bàvwà bajimìne.”

28 Mpindyewu, Yone. Nudi nwela meeji ne bàakamba cinyi? “Kùdi mukoleshi wa maalu wa kale kuntu kwàka, mulùmýàna wa kale wa kwísù kwònsò kushitákàne, mupatùkile mu cipèèla mwikale mudijingile cisèbà cyà mùkòòkò mu cifùka. Kàdi, mòna’s, mmwimàne mu bitoci, ku makàsà kutupù, kuntu kwaka ku mwelelu wà Yadènè, ne wenza maalu à lukutukutu kuntwaku. Nganyi ukààdikù muumvwe cintu bu nànkù?”

29 Pàakalwa Yesù. “Maasiyà wetù ewu, mulelela lwà mu cikumbi mwàmwa, pa mushiki wà bisoosà, ne—ne ngombe mimunyungùlùkile yidila? Nènku—nènku udi uswa kwamba ne maamù. . . Mulela mu masandi, bu mùvwà tatwèndè. . . Maamù wàkiimita kumpàla kwà kabàyi nànsha banji kuswika dibàkà, mòna’s, Yèyè’s ùvwa mulediibwe pambèlù pàà dibàkà dyà cijila. Mwine muntu awu?” Kaa, ekèlekèle! Nwamònu anyi? Kàdi Cìvwa Cinène, kabàvwa ànu baCimanyè to. Nwamònu anyi? Kabàvwa baCimanyè to.

30 Ne ki mùdi Èvànjeeliyò leelù ewu “Munène.” Ne Èvànjeeliyò ùdi munkaci mwà kunyukusha mùtùYe kacya kàyì mwanji kunyukusha kwònsò eku to, kàdi Ùdi unyukusha mu bashààdile. Ncyà bushùwà, munkaci mwà kubàlongolola.

31 “Yèyè wàkalwa kùdi Bèndè, Bèndè kabààkaMwakidila to.” Wàkambila bayiidi Bèndè ne: “Kanùyì kùdi bàà Bisàmbà byà bendè to, kàdi ndaayi ànu kùdi mìkòòkò mijimìnè yà Izàlèlèlà. Nènku, panùyaaya, ewu udi unwàkidila mmungààkidile Mémè. Panùdi nubwela mu cimenga, kabàyi banwàkidile to, nutuutule lupwishi lwà mu makàsà ènù nùkwatè njila nùye. Nènku mu bulelèlèlè Ndi nnwambila ne, nebiikale mwà kutàmba kutwàla Sodoma ne Gomola mu ditùkù dyà Cilumbulwidi kupita mwikalabo mwà kutwàla cimenga aci.” Ne eci cyònsò cyà ku bimenga cyàkabenga bantu abo aci cidi mu butù leelù ewu. Eci cyònsò cyàkabààkidila, cìcidi kacya cìimana bu mùdi mikete. Ncyà bushùwà, nwamònu’s. Byàngata ntàntà mule bwà kwandamuna; kàdi Nzambi ùtu wàndamuna, kùtácishi

meeji to. Ncilu kubanga aci to, cyanàànà ncyàkufika kudilenga Bwàkabuulwibwà to. Kaa!

Kaa, ndi muswè kuMumòna, ntàngila mpàla
Wendè,
Bwà kwimbamù bwà kashidi bwà ngàsà Wendè
udi usùngila;
Mu mìsèèsù yà Butùmbi mbandishè díyì
dyànyì;
Pààpìta ntàtu yònsò, ndekeelu wa byònsò
kumbèlu, bwà kusànka kashidi.

³² Ntu munange aci. Twìnyikààyi mitù yètù bwà katanci kakesè cyanàànà. Nudikù baswè kwimana kuulu kumpàlà kwà kucyènza anyì? Ndi—ndi ngeela meeji. . . Bible mmwambe ne: “Pàùdì wimana kuulu, usambila, ufwe luse.” Mbanganyi bàdì ne dilòmba didìbo baswè ànu kumanyisha ku dyela dyà cyanza kuulu? Vùlukààyi ne, Nzambi ùdì ùcimòna, Yéyè mmumanyè byònsò pa bwalu abu.

³³ Taatù wetù wa mu Dyulu, nyèwù tuseemena pabwìpì ne Cijila Cyèbè cyà Bunzambi mu Dìna dyà Mukalenge Yesù, Dìna didì dikumbànyìne mu byònsò adi dyàkafidiibwa mwab’ewu munkaci mwà bantu, bwà ne nànsha mèkù mu Dyulu ne pa buloba mminyika ne “Yesù.”

³⁴ Nènku tudi tulòmba, Mukalenge, bwà Wèwè kwakidila disàkidila dyètù. Dyàmbedi, bwà kubanga, bwà cidimu cidì munkaci mwà kufwà eci. . . bu mutùdì tujikijangana naaci dilòlò edi mu masangisha, tujikijangana naaci mu kufila butùmbi, mu kulonga Dìyì Dyèbè ne mu dimanya cidì EMU MÙDÌ MUKALENGÈ WÀMBA cyumvwija. Mbintu búngìpu kaayi bitùdì mwà kufùnda pa dibèji bwà kusàkidila’s wè! Mapanduka à tupàndukila mu mitanta mikesè, mibùlàkane atùdì bapete cidimu eci, mwaba ùvwa Sàtaanà mufwànyine kwikala mujikije mwoyi wètù, kàdi Kwèna mwanji kujikija neetù to. Pa nàнку tucìdì ànu twenda tutùngunuka. Tudi twitabuujà, Mukalenge ne, tudi ànu balediibwe ne bakolèshiiibwe mu buloba emu bwà kukupà luumù ne kukutùmbisha Wèwè.

³⁵ Nènku tudi tulòmba, Taatù, bwà Wèwè kutùfwila luse ku matomboka ónsò ne cilema cyònsò citùdì benze mu lwendu lwètù lwònsò. Enzaku bwà tupwe bilema byètù mwoyi dilòlò edi patùdì tubitonda apa, tubijiika mu Mbù wa Cipwàmwòyi, mu Dìna dyà Mukalenge Yesù, bwà kabìyi mwà kujuudiibwa cyàkàbìdì to; kàdi mpindyewu tukolesha batàngile ku cimanyinu eci, kùdì Muntu mupwàngàne awu, Kilistò Yesù. Enzàku nàнку dilòlò edi, Taatù.

³⁶ Pààkula basadidi Bèèbè, yònsò wa kùdìbo, swàku Ubàlaabe maanyi ne Nyumà wa Mwoyi, nènku swàku bwà bayiishe mutùbo kacya kabàyiку banji kuyiisha, ne bàtwale mayiisha mu èkèleeziyà dilòlò edi.

37 Nènku tudi badisangishe apa mwinshì mwà musàkà mukesè ewu, utùdì ne kusàkidila bwàwù ewu, Mukalenge. Tudi ne kusàkidila bwà kwikala ne kapyà kîmpè kwà twètù kusòmbela, bwà musàkà pamutù pàà mutù wètù, s'ki cyònsò citùdi naaci dijinga.

38 Bwalu mabanji ètù kaèna mu ebu buloba to, àdi mu buloba bùcilwalwà. Nzambi, tudi tuàtèèka kuulu kwaka mwaba utùdì twitabuuja ne biivi kabèèna mwà kubwela ne kwiba to, ne dimomà kadyèna mwà kuànyanga to, bwalu mabanji ètù m'Mwoyi wà Cyendèlèlèlè. Nènku tudi tulòmba, Taatù, bwà Watùlekelaku tusànka naawù matùkù ònsò à mwoyi wètù.

39 Tuvwije basadidi bakùmbànyine. Umusha bubì bwònsò mu twètù, Mukalenge, byònsò byà kale abi. Kubitèèka . . . Swàku bwà miji yònsò yà budimù ne bululu bwònsò bùumushiibwe mu myoyi yètù, bwà twamòna mwà kudipwekesha ne kalolo kumpàla Kwèbè. Enzàku nànkù, Mukalenge. Tupèèsheku cidimu citàmbe bunène citùtù kacya katùyiku bânji kupeta to, cidimu cilwalwà eci. Enzàku nànkù. Tùpèèshèku mpindyewu, dilòòlò edi, Díyi Dyèbè patùdi bindile mayiisha Èbè apa. Mu Dîna dyà Yesù mmutùdì tulòmba emu. Amen. Swàyai nusómbe.

40 Mpindyewu, mbyenze bu binkolèle bwà kumòna díbà dyà ku cimanu didi lwà kwàka, ne ncyèna muswè kulama bânà bèètù bashààle bindile to, nànkù nènteetè bwà kulwijakaja ne lubilu lukolè ne mwànyì mwònsò bwà kujikija citùpà eci. Nènku, pàmwàpa, twètù katùyì bajikije to, díbà adi mààlabà mu dindà netùteetè pàmwàpa bwà kutungunuka, bu Mukalenge mwà kwanyisha. Ne pashìishe pùikalà Mwanèètù Neville kàyì mulwe to, anyì ní ncinyì cyònsò, èè, díbà adi nènteetè, bu Mukalenge mwà kwanyisha, bwà kwikala kaaba aka bwà kutungunuka ne mudimu wà kàlaasà kàà Dyàlumingu.

41 Mpindyewu, kanùpu mwoyi mpindyewu to:

Sambilaayi, sambilaayi, mùshindù
wùmwèpelè
. . . wà kufika mu myaba mitùmbùke;
Sambilaayi, sambilaayi, disambila dyà
diitabuuja
Neditùùlule mabènesha à Nzambi.

42 Ki mùshindù wùmwèpelè wùdiku mwà kucyènza. Tùwimbàayi pàmwè. Cidimu Cipyacipyà eci mpindyewu, tudi ne díbà dyàbúngì.

Tùsambilàayi, sambilaayi, mùshindù
wùmwèpelè
Wà kufika mu myaba mitùmbùke;
Sambilaayi, sambilaayi, disambila dyà
diitabuuja
Neditùùlulè mabènesha à Nzambi.

43 Nènku pìikala disambila dyà diitabuuja ditùulula mabènesha à Nzambi, tutùngunukàayi ne kusambila. Ndi ne disànkà dyàbùngì, dilòòlò edi, tudi ne mpàlà mipyamìpyà mu Bukalenge bwà Nzambi yìvwà kàyiylimu mu cidimu cishààle eci to. Nènku ndi, ànu ntùngunuka ne kusambila bwà bàbùngì menemene bàsàkidiibwa dìbà dyònsò. Kàdi nànsha cyàbìbìdì cyà biikalaku mu luseke lukwàbò abi kì ncyanjiku kulondiibwa to.

44 Mpindyewu, netùbuululè ku nshapìtà mwi4 wa Bwàkabuulwibwà. Kùdikù muntu dijinga ne Bible anyi? Tudi ne ndambù wa Bibles kaaba aka pawikala muswè kutùlonda. Èyo, umwe wa ku baawisiyè àbande kuneeku mpindyewu, tudi ànu ne mushikì mujimà wà Bibles kaaba aka. Umwe wa ku balubuludi, baawisiyè, anyi cikampànda, àbande kuneeku buludi. Mwanèètù Zabel; lekèla mukwàbò alwe, kàbìdì. Nwènù baswè ànu kwangata nseke yònsò yìbìdì, nènku netùpweke buludi ne elu luseke. Ne muntu yònsò udi muswè Bible, bwà kulonda pàmwè neetù, mòna's, pwekàayi ànu naayi ne nuyipèeshè muntu yònsò udi naayi dijinga awu.

Nènku tudi baswè bwà nùbuululè mpindyewu mu Bwàkabuulwibwà, nshapìtà mwi4.

45 Nènku, mpindyewu, pawikala musòmbele paanyimà kàdi muswè kutentemuka kulwa kumpàla eku, tudi ne nyaba yàbùngì dilòòlò edi bwà nwènù kubàndila kuneeku. Nènku nudyumvwe bancyankàme, nènku tubwelàayi buludi mu dìleesònà ne nùcìbalèku pàmwè naanyi, ne tucìlonge patùdì badìsangishe apa. Kùdi nkwasà lwà kuneeku. Ndi mmòna babàka bàbìdì balwa. Nènku nkwasà yìbìdì's nyòyi eyi kaaba aka mene. Umwe nyewù bwà muntu udi nkaayendè apa ewu. Nènku ànu lwà paanyimà apa, kùdi ànu nkwasà mwab'ewu. Ndi ncinka ne bipeepudi bìdì ànu byela lupeepa myaba yònsò.

46 Nènku mpindyewu, mbanganyì bàvwà basànke ne dìleesònà ditùdì tufùma ku dilonga, dìleesònà dyà matùkù mwandamukùlù pa *Bikondo Mwandamutekète Byà Èkèleeziyà?* Twasàkidiilaayi. Bidi byènza ne ndyumvwè bimpè, bwalu ndi mupetèlekù bulelèlà dibènesha dinène mèmè mwinè.

47 Mpindyewu, dilòòlò edi ne nshapìtà mwi4, tudi tushiya mpindyewu, Yone wàkaakula ne Cikondo cyà Èkèleeziyà wa Laòdikiyà. Nènku, mu Cikondo eci cyà Èkèleeziyà wa Laòdikiyà, cìvwa ncikondo cyà èkèleeziyà cyà cibwejàkàji ku byònsò abi.

48 Nènku tudi tusangana cintu cyà citàmba kwenza luse mu citùpà cyà ndekeelu cyà Cikondo cyà Èkèleeziyà wa Laòdikiyà, Yesù mwimàne pambèlù pàà èkèleeziyà Wendè Sungasunga mùvwàYe mwipàcìbwe, ùkookola ku ciibi, ùteeta bwà kwalukilamù. Aci kì mmpèkàatù anyi? Ngeela meeji ne aci's cidi bu ùmwè wà ku Mifundu yà yenza luse untuku kacya ngaabala. Yesù, pambèlù pàà ciibi Cyèndè Sungasunga, ne

èkèleeziyà Wendè muMwele pambèlu, kàdi Ûvwa uteeta bwà kwalukilamù ànu bwà kubàsungila. “Muntu yònsò wakàngula, uNdekela ngàalukila mu nzùbu Wanyi Sungasunga, Nèndye nendè pàmwè cyàkudyà cyà dilòòlò ne yéyè pàmwè Naanyi.” Aci kí...aci kí ncyà cyenza luse anyi? Nzambi wa mu Dyulu, mwela pambèlù pàà èkèleeziyà Wendè Sungasunga, kùdì twitabàayi yàbò ne màngumba ne mùshindù wùvwàbo bènza awu. Mubeele pambèlu...baMwele pambèlù pàà èkèleeziyà, biitabe twitabàayi yàbò.

⁴⁹ Cidi ànu ncintu cìmwècìmwè mwàkadibi mu ditùkù dyàkapoopediibwa Yesù pa nkùruse. Nènku aci's mpààkiitabàbo Baalàbààsè, mushipyanganyi, kàdi kupoopelabò Yesù ku nkùruse. Kulekelelabò mushipyanganyi munkaci mwàbò, uvwa mujaadikiibwe ne “mmushipyanganyi,” ne kwitaba... ne kubèngabo Yesù Kilistò, Umwèpelè uvwa mwà kubàpèèsha Mwoyi awu.

⁵⁰ Nènku s'ki cintu cìmwècìmwè cidi naaci dìngumbà dyònsò, ne dìngumba dyà beena Mpenta, leelù ewu. Bàdi bamòna ne màngumba awu àfwafwa buludi ànu pàdìwu adyènza dìngumba apu. Kakùtukù kwanji kwikala nànsha dìmwè (mu—mu mikàndà yà maalu-malonda) dituku kacya didìvwije dìngumba kàdi dyenzeku kacya cintu kampànda pa kuumusha kufwà buludì. Bimanyinu byònsò, maalu à kukema, ne mapà kubùumukabì, ne bikwàbò byònsò, pàvwàbo ànu ne baadìvwiji dìngumba. Nènku pamutù pàà kwitaba Mukalenge Yesù bwà kubàpèèsha Mwoyi, bàakalukila buludi ne kulekelela Baalàbààsè munkaci mwàbò cyàkàbìdì. Aci kí ncintu kampànda cyà cyenza bwòwà anyi? Kabyèna bikèmesha to pàvwà Nzambi mwela pambèlù pàà èkèleeziyà Wendè, ne mwimàne, ùkookola, cikondo cyà ndekeelu cyà èkèleeziyà, ùteeta bwà kwalukilamù.

⁵¹ Mpindyewu, tudi tujandula ne Bwàkabuulwibwà mbutèeka mu bitùpà bisatù. Cyà kumpàla n'nshapità yìsatù yà kumpàla ayi, mmitàngile maalu à Èkèleeziyà, Mukenji awu, mwanjèlò... mutùmina banjèlò bàà Èkèleeziyà. Nènku kuumukila... Nènku pashìishe Yéyè ùdi ùmuka mu cyàlu ànu mu nshapità mwi3, kèna ùmwènèka kàbìdì to too ne ku nshapità wa 19, mu nshapità wa 19 ùdi wàlukila. Pankaci pàà cikondo eci, Nzambi ùdi ùkwàta mudimu ne beena Yudà. Pashìishe, kubangila ànu apu, cidi pankaci pàà dilwa dyà cimenga cinènè cyà Yelusàlèrà, ne di—ditwibwà dyà citampì dyà cisàmbà cyà Izalèlèrà, ne bikwàbò, ku cikondo cyà nshìikidilu.

⁵² Mpindyewu, ki bwà cinyi dilòòlò edi tudi tushiya... Dyàkamwè paanyimà pàà eci nùnkù, Yone wàkamòna...Mu cisanga cyà Paatèmò...Mbanganyi bàdi bavùlùke bule bwà ntàntà bùvwa Paatèmò usanganyibwa ne...kule ne mwelelu wà màyi? Mbule kaayi buvwaye ùsanganyibwa? Kilòmèetà mitwe ku makumi anaayi ne mwandamukùlù, ncyà bushùwà, kule ne ku mwelelu wà mbù. Nènku nyungulukilu wà Paatèmò

ùvwa bule kaayi? Nudi bavùluke àmwè àà ku maalu àà buloba anyi? Kìlòmèètà mitwè ku makumi àbìdì ne yinaayi yà nyungulukilu wendè. Kàdi cìvwa cyangaciibwa bu mwaba wà diipacila beena Loomò, kwelamù beena bùlokò. Nènku Yone ùvwa mwela muntwamu bwà cinyi? Ùvwakù mwenze cinyi? Ùvwa—ùvwa mwibe cintu kampànda anyi? To. Ùvwa . . . Bääkamwela muntwamu bwalu ùvwa ùtácisha bantu ne . . . anyi wènzà cintu kampànda cibì anyi? To. Yèyè ùvwa kuntwaku bwà cinyi? Bwà Dîyì dyà Nzambì ne bujaadiki bwèndè, bwà kuyiisha Èvånjeeliyò.

⁵³ Kàdi cintu kampànda cidìku mwà kwenzekela mwena Kilistò kaciyì bwà bwímpè anyi? To, to, to. Nànku cìvwa Nzambì mumupàtwile pambèlù apu nkaayendè mu cisanga amu ncinyi? Bwà kutùpèèsha Mukàndà wà Bwàkabuulwibwà ewu. Nwamònu's, Nzambì ùdi ànu mwà kukùtakaja dyabùlù dìbà kàna dyònsò dìdìYe muswè adi. Kì mmwòmò anyi? Yèyè Ùdi ànu mwà kwenza nànku cyanàànà. Ndi ànu muMunange. Bwalu, kabyèna bikèngela bwà mèmè kwikala ne meeji matwè to, nwamònu's. Mpindyewu, bu ne mvwa ne meeji matwè, ndi mufwànyine kuteeta kuàpwa ònsò mwoyi bwalu ncyèna mumanye muntu nànsha umwe uvwa mwà kwikala ne meeji matwè bu Yèyè to. Nànku ndi—ndi ànu . . . Cyònsò cìndi naaci, ndi ndilekelela kùdìYe ne ngenza ànu cidìYe wàmba bwà kwenza. Kwàjiki. Míngà misangu mbibengangane ne mùshindù ùntù ngeela meeji ne ki wówù. Kàdi ndi mumanyè ne, Yèyè ùcilombola, Yèyè ngudi ne meeji matwè. Yèyè mmumanyè cidìYe wènzà, mèmè to. Pa nànku ndi ànu mmulekela Yèyè ùcyènza, nudi numòna's, dìbà adi cidì ànu . . . cidì mu cyòci. Nwamònu anyi? Pa nànku ndi mMulekela ànu ùcyènza. Ki cyòci aci, Mwanèètù Neville. Èyowà's, mukalenge, Mulekèle àcyènzè ànu cyanàànà. Nwamònu anyi? Yèyè ki Udi mumanye cidìYe wènzà, mèmè to. Nwamònu anyi? Pa nànku ncyèna ànu nteeta kwediibwa bilòngò binène ne bikwàbò to. Kàdi ndi ànu ndipwekesha mèmè mwinè, ngàmba ne: "Kì mèmè ewu, Taatù, dìbà kàna dyònsò dy'Ùdi naanyi dijinga adi." Nànku ntùngunuka ànu ne kuya mùshindù awu ne cìtu misangu yònsò cyenzeka mu cyòci.

⁵⁴ Pa nànku, Yone, katùvwa kwikala bapetè Mukàndà wà Bwàkabuulwibwà ewu—ewu bu kabùyì bwà Yone nànsha, ne bu Yone kàyì mupatuke muye mu cisanga amu to. Aci's ki cìvwa njila wa Nzambì bwà kutùpèèsha Mukàndà wà Bwàkabuulwibwà. Ùvwa kuntwaku, ngeela meeji, bidimu bitwè ku bisàtù, ne mu Mukàndà . . . kufùnda Mukàndà wà Bwàkabuulwibwà.

⁵⁵ Mpindyewu, dìbà adi tudi bamushiye ku dibìikila dyà ndekeelu, dyà mvensà wa 22 wa nshapìtà mwi3: "Ewu udi ne macì, ùmvwe cidì Nyumà wàmabila maèkèleeziyà."

⁵⁶ Mpindyewu, kubangila ku nshapìtà mwi4:

Paanyimà pàà cyòci eci mémè kutàngila, ne, mònaayi, ciibi cyunzulula mu dyulu: ne diyì dyà kumpàla dingààkuumvwa divwa dyenze bu ne divwa . . mpungi wàkulangana naanyi; divwà dyamba ne: Banda kuulu kuneeku, nènku nènkuleeje maalu àdi ne cyà kwikalaku pashùshe.

57 NetùCyangate ku mvensà ku mvensà. Nènku ndi ne Mifundu bungi cyanààna mifunda kaaba aka, mukàndà mujimà wàyì, kàdi ncyèna mumanye ne ntoo ne penyì pangààfika naaCì. Mukalenge àtùlombòleku. Mpindyewu, tàngilàayi, Dìyì didi ne:

Paanyimà pàà maalu aa (paanyimà pàà cikondo cyà Èkèleeziyà) . . .

58 Ne cyònsò eci kuumukila ànu mwab'ewu, mpindyewu, necitangile, necyènzeke pa buloba paanyimà pà Dyambwibwa dyà Èkèleeziyà. Nwamònu's, paanyimà pàà Dyambwibwa. Eci necipinganè mpindyewu bwà kwambula Izalèlèlè. Paanyimà pàà cikondo cyà Èkèleeziyà, paanyimà pàà bikondo byà Èkèleeziyà, ne bwòbò . . . Èkèleeziyà kì mmumwenekeku kàbidi to too ne ku Bwàkabuulwibwà nshapità wa 19 pàdiYe walukila ne Mubàki Wendè. Nzambì àtumbe bwà Didyà dyà dibanji!

59 Twänjàayi kubala aci. Nudikù baswè kubala Mifundu eyi patùdi tuyibala apa anyi? Èyo. Tùbuululàayaaku mu Bwàkabuulwibwà 19. Èyo, mukalenge, Bwàkabuulwibwà 19. Tùbangilàayi ku mvensà wa 7, Bwàkabuulwibwà 19. Eci mpàdi Èkèleeziyà ùmwènèka cyàkàbidi, kavwaku mumwènèke kàbidi to too ne mu nshapità wa 19.

Tùsankàayi ne tùcyonkomokàayi, ne tùmupàayi luumu: bwalu dibàkà dyà Mwàna wa mùkòòkò dyàkuluwa, ne mukàjèndè ùkaadi mumane kudìlongolola.

60 Kaa, ndi—ndi mwà kuyiisha pa bwalu abu too ne mundankùlù kàdi ncyì ngàmba cyàbìbidi byàci to. Tàngilàayi ne: “Mukàjèndè mumanè kuDìlongolola.”

61 Charlie, Nellie, ne nwènù bwònsò, ànu citùvwà twamba aci, kuntwaku, ne Rodney, ditùkù adi. Nwamònu anyi? Paakakùpà Eliyà cilàmbà aci pa Elishà . . . Anyì pààkacitèeka Eliyà pa Elisha; wàkoolola cyanza ne kucyàngatulula kàbidi, kucilwátaye ne kwasa naaci lwendu too ne mwàkasabukàye naaci Yadène, ne kuyaye pa mukùnà ne kubàndayè mu ditempu, kucimacishaye.

62 Pàdi mwena Kilistò musùngidìbwe dyàmbedi, mpàla wendè ùdi utàngila kùdi Kilistò, dībà adi ùdi ne cintu cyà kwenza yèye mwine. Cintu cidi cilonda, bìdi bikèngela bwà yèye kudìjidila ku bibidilu byònsò bikooyike: “kutèeka ku luseke bujitu bwònsò, kuDìlongolola. Mukàji-musèla mmuDìlongòlòle!”

63 Cidi cìmvùlwija kaabwalu kakesè, ndi ànu ne cyà kukààmba kumpàla kwà twètù kutùngunuka. Lwà ku Wesètè eku, kukaadi

cikodo kampānda, bidimu byābūngi, kùvwa Kumpānyī munène wa Armour ne Swift Packing. Civwābo benza ncinyi's, bāvwa bālwa kuntwaku bwā kusumba ngombe ne kusumba maferme. Nènku bàdi ne mfranga bungi cyanāàna, ne basumba fermes mikesè yōnsò, ne bapeta miliyò yā hectares yā ferme mùshindù awu, bālamnamù bisumbu ne bisumbu binène, bilenga byā ngombe byā Hereford abi. Yābò bōbò. . . Biikale ne yābò njila yā njanja sungasunga ne bikwābò yidi yitwāla ngombe ayi ku cikumbi ne ku cikwābò.

64 Nènku Armour ne Swift ùvwa ne cipaapu cinène cyā ferme, kadi dīngā ditùkù baakapetamù mutāngidi wa midimu, mulombodi wa byōnsò, muvwābi, wa ferme awu, yēyè awu ùvwa ne nsongāākājī bu yīnaayi anyi yītaanu. Nènku kujandulabo ne umwe wa ku bānā bāābò ne Armour munène awu ùvwa. . . anyi, kī mbānā bāābò to, kadi umwe wa bānā bēnda balela ne, ùvwa ne cyā kuya kwendakana mu ferme. Kadi yēyè awu ùvwa—ùvwa nsongāālūme, muntu mujike. Nènku nsongāākājī yōnsò yivwa mitwishīlwe ne yivwa mwā kuseeswisha nsongāālūme ewu ànu ne—ne cifiikidi cyēndè. Nānku ki bwōnsò kudilongolobò ne kulngololabò byōnsò bwā dilwa dyēndè.

65 Pāākafikaye kuntwaku, bāvwa ne cyā kumwakidila ne kulngolola ditùkù dyā mwakidilu, bavwāle tuunkanzu twābò tukesè atu, twikale ne mālendā eku ne eku, ne tungoma twā tutūpā twā 44 tupayika ku mikābā, ne bifulu bikokela paanyimā pāā mitù, nudi bamanye's. Nènku bāvwa mwā kwikala beena ku wesètè ànu bèètù bāā ciibidilu abu, ne yōnsò wa ku nsongāākājī eyi ùvwa ne cyā kupeta. . . Umwe wa kùdibo ùvwa ne cyā kubakula nsongāālūme ewu.

66 Nènku bāvwa ne—ne kānā kāā tatwābò mukwābò kuntwaku keena tatwākù uvwa mufwè ne mamwākù mufwè. Yēyè awu ùvwa mwānā wa bakājī wa tatwābò mukwābò, nènku ùvwa ànu bu mupika menemene kùdi bwōnsò bāvwa kuntwaku abo. Ne midimu yōnsò yā bukooya, bivwa bikēngela bwā yēyè kuyēna, kusukula malongu ne bintu byōnsò. Kadi kāvwa ne bilāmbā to, bīmukēngela kuvwālaye bilāmbā byā nkōmbù ne. . .

67 Nānku pāākakumbana dībā divwā nsongāālūme ne cyā kufika, bwōbò bwōnsò kubwela mu matempu āābò ne, ki bwōbò bāyaaya abo, batāngile ku ngālā bwā kumwakidila. Nènku bāvwa batuuta bingoma, ne tubalu tutwa kumpāla twalukila tukungwila mu mawulù, ne bikwābò byōnsò. Ne kuyabo nendè ku ferme aku. Kadi dilòlòlò adi bāvwa ne difesto dinène. Ki kupātukabo kuntwaku kuya ku bitèekedi byā byākudyā ne ku myelelu yā lupangu aku, ne bōbò—bōbò kwimba ne kujabo maja, dilòlòlò dijimā adi. Yēyè ùvwa kuntwaku bwā matùkù ābidì anyi àsātù.

68 Kānā kāā tatwābò mukwābò aku. . . Mpindyewu, ndi muswè kufwānyikija eci ne cintu kampānda mpindyewu. Bānā bāā

tatwètù mukwàbò bàdi bavwàle cileya, ne èkèleeziyà mîmpé myasa tuleyi tunène, ne yimweka bu ne kwòkò kwikale dínà dyà bukooya bikèngela kudipa beena mpenta, cintu kampànda cyà cibì. Bàdi pààbò benza cintu cibì, kàdi kanwàkuumvwaku bàcíteeya to, nudi numòna's. Bòbò mbàà milongo yà kuulu, nànkù bàdi . . . kanwàkuumvwaku bàtèèla bwàbù bwalu to. Kàdi mwambi kampànda wa cyena Mpenta enzebi cilèma musangu ànu ùmwè, díbà adi, mukwètù, ncikwambidi, nebàbùtampàkàje ditunga dijimà mu cikàndàkàndà cyònsò. Èyowà, mukalenge. Mwanèètù kampànda wa cyena mpenta àdidìnge asambidile mwànà kampànda, kàdi mwànà awu àfwe, cibejibeji cyònsò mu ditunga aci necibusambulujè ne: “Dyondopa dyà kùdi Nzambi's Ndikolesha dyà maalu.”

⁶⁹ Èè, díbà adi mbwà cinyi kubenga kufùnda mu cibejibeji bwalu bwònsò bùdi bangàngàbukà bapangila? “Bipata nshimbà mbala kuseki, lubilu ndwà bukwànyama.” Nwamònu anyi? Pa nànkù, bu bwòbò mwà kwenza nànkù, kí mbafwànyine kupeta mwaba mukùmbane mu milongo yà bibèjibeji abi wà kufùnda bafwè bwònsò abu. Mémè mwà kuya mu nkítà emu ne kwamba ne: “Muntu yònsò udi mufwile ku dyondopa dyà kùdi Nzambi abiikè,” ne pashiishe kwamba ne: “Muntu yònsò udi mufwile ku byanza byà ba mingàngà àjuuke,” mbafwànyine kupita abu ku búngi mùliyò mujimà ku umwe. Ne aci's ncilelèlè menemene. Nànkù bwòbò ne cyà kudyula ewu, badyule kàbìdi mukwàbò. Nànkù's ncyà bushùwà. Kàdi bàdi bashipa miliyò ne miliyò ku cidimu ne manga ne dipandangana, ne kanwàkuumvwakù bàbutèèja to. Nudi numòna's?

⁷⁰ Pa nànkù, kaansongàakàjì kakesè aku, kàvwa ne midimu yònsò mikolè ayi yà dyenza. Nànkù díbà adi, dyàkamwè, nsongàalùme. . . dilòòlò kampànda didyà dyà dilòòlò dimane kujika ne bamane kuja maja, ne yònsò wa ku nsongàakàjì eyi ùvwa mudilengeje ne èyo, nudi bamanyè's. Kàdi nsongàakàjì mukèsè ewu ùvwa mwenzejìbwe bwà kulwàta nkanzu mukèsè, wa kale musùnsùke. Kàdi dilòòlò kampànda ùvwa musòmbe mu nzùbu wa cidiilu paanyimà pàà didyà dyà dilòòlò dimane kujika, nènku ùkaavwa musukùmwè málòngù ne mupàtùke pambèlu bwà kwimansha màyi à nsangidilu awu kumfundu aku. Yèyè. . . mmwenze ànu unyunguluka ku cimanu cyà lupangu aku, ki mwabilaayi ewu mwimàne, mweyèmene ku cimanu cyà lupangu aku. Yèyè ne: “Wetwàwu.”

⁷¹ Nsongàakàjì ne bundu bwà kacya, bwalu awu's ùvwa mwànà wa balùme wa mutàngidi mukùlù wa bintu, mwànà wa mwena ferme awu. Kupwekeshaye cyesu aci panshi, bwà kíkadi wàlwa kumumòna mùshindù ùvwaye musùnsùke awu to; kubangaye wènda ùpingana cyànyimà, ku makàsà kutupù, wènda ùtàngila panyimà, nùnkù ewu.

⁷² Ki nsongàalùme kwasayè lwendu mutàngile kuvwaye aku, kwambayè ne: “Kùciinyi to.” Yèyè ne: “Ndi muswè kukwambila

cintu kampànda.” Yèyè ne: “Ndi mulwe mwab’ewu bwà kiipacila kampànda, ndi mulwè kukèba mukàji wa kusela.” Ki yèyè ne: “Ndi mukèbangane nendè myaba yònsò.” Yèyè ne: “Ncivwa muswè kusela nànsha umwe wa ku bânà bàà bakàji bàà mu cimenga abu to, ndi muswè kupeta cìmvwà ngeela meeji ne ki mukàji wa bushùwà.” Ki yèyè ne: “Ku bwònsò bankaadiku mumòne, ndi munkaci mwà dikutwìshila wèwè mèsù mwaba ewu. Nènku ndi mujandwile kùdi bàmwè bantu ne udi mwànà wa mwanààbò ne mutàngidi.”

Yèyè ne: “Ncyà bushùwà, mukalenge.”

73 Yèyè ne: “Ndi muswè nkulòmbeku cintu kampànda. Udikù mwà kwitaba bwà nkusèlè anyi?” Mòna’s, kàvwa mumanyè cikwàbò cyà dyenza to. Ûvwa ne bundù bwà dikèma, kàvwa—kàvwa mumanyè mwà kwandamuna mulùme awu to.

74 Kaa, ndi ànu ncinka bwà mùshindù wàkadyùmvwàye. Kí mmwómò? Pàmva mèmè ewu, musangu kampànda ngènzàmpèkààtù, nciyi pabwàsà, mwànà wa kanwàyi, Yesù Kìlistò kwamba ne: “Ndi muswè bwà wèwè wìkale Wanyì.” Mmuniyì mùvwàYe mufwànyìne kulwa kùdi muntu bu mèmè ewu? Mmuniyì mùvwàYe mufwànyìne kwamba ne: “Nènkupèèshè dikù mu Dyulu”? Mmuniyì muvwàYe mwà kwamba ne: “Nènkusungile”? Mukèngeledi wa luse bu mèmè ewu, mmuniyì mùvwabi mwà kwikala? Kàdi Yèyè wàkacyenza’s!

75 Yèyè ne: “Mukalenge, ndi—ncyèna—ndi—ncyèna mukùmbànyìne to. Ncyèna mufwànyìne kwikala mukàji wa muntu bu wèwè to,” yèyè ne, “bwalu wèwè utu mwibidile ne bintu binène. Kàdi mèmè ewu ncitu mumanyemu kantu nànsha kàmwè to, ndi mupele.”

Yèyè ne: “Kàdi wèwè ki disungula dyànyì.”

76 Kàdi kabìvwaku bilenga pààkakwambila Yesù ne...? Wakamanya ne kùvwa mukùmbànyìne bwà kwikala mwena Kìlistò to. Wèwè, kakùvwa cintu nànsha cìmwè cyùvwà mufwànyìne kwenza to, kàdi Yèyè...Ki ncintu nànsha cìmwè...Yèyè—Yèyè wàkakusungula ànu cyanàànà. Wamònu anyi? Yèyè...Cintu’s mbwìmpè Bwèndè, luse Lwèndè pààkakusungulàYe. Kí ngwèwè wàkaMusungula to, udi mumanyè’s, Yèyè ngwakakusungula. Ncyà bushùwà.

Yèyè ne: “Ncyèna—ncyèna...” Yèyè ne...

77 “Kutàngidi ku bilàmbà byèbè to. Mèmè ncyèna ntàngila ku bilàmbà byèbè to, ndi ntàngila cyùdi wèwè aci.” Yèyè ne: “Udikù mwà kwitaba bwà nkusèlè anyi?” Ne ndekeelu wa byònsò bààkiitabangana. Ki yèyè ne: “Mu cidimu cìmwè kuumukila ku ditùkù edi, nempingane. Wèwè dilongolole. Wìkalè muvwale cilàmbà cyà dibàkà, bwalu nempingane bwà kukusèlela ànu mwab’ewu. Nènku nénye neebè ku Chicago, ku cibeeba cyà Outer Driver, kwòkò aku nkuwikala ne nzùbu wa bukalenge

wà wêwè kusòmbelamù. Nàнку disukwilangana dyònsò dyà malòngù edì nedijike, ne bikwàbò, dìbà adi.”

⁷⁸ Pààkuumvwa bânà bààbò bàà bakàjì, anyì bânà bàà tatwèndè mukwàbò bwalu abu, kwambabo ne: “Wêwè kapèlè, kantu cyanààna, kaacinyonga kakùtàkane aka! Mòna’s, udi kamanye bîmpè ne muntu awu kàvwa ne awu meeji to!”

⁷⁹ Kàdi kí ng’aci cidìbo ànu bàmba leelù ewu menemene anyì? “Mmunyì mùdì musùmbà wà bansantu babùnguluki bàà mu malaba, musùmbà wà bantu bàdì kabàyi nànsha mwà kufùnda dínà dyàbò diinè, mmumnyì mùdìbo bafwànyine kwikala Èkèleeziyà? Mmunyì mùdì musùmbà bu awu mufwànyine kwikala nàнку?” Kàdi’s aci cidì ànu cyà bushùwà. Patùdì tupangadika ne tumvwa ditwà dyà mishikù yà dipangadika dyà dìbàkà yà Yesù Kilistò pa mwoyi wètù bwà kuumusha mpèkaatù, Cintu kampàndà cidì cìtwàmbila ne Yèyè neàpinganè cyàkàbìdì, cyà bushùwà menemene ànu mùdì buloba amu. Dìngà ditùkù Yèyè neàpinganè.

⁸⁰ Wàkakwàta mudimu cidimu cijimà aci, bu mupika, ulaminyina tumeeyà makumi mwandamutekète ne tutaanu twà bicyele atu, tùvwàbò—tùvwàbò bàmufuta bwà mudimu wèndè wà ku ditùkù ne ditùkù atu. Nènku ùvwa ùlaminyina tukuta twèndè bwà kusùmbàye nkanzu wa dìbàkà, bwà kulongolola kantu ne kantu. Kaa, ki cyònsò cìvwaye naaci mu meeji èndè, kudìlongolola. (Nènku ùvwa. . . “Yèyè mmuDìlongolole.”) Ùvwa ne bilàmbà byèndè, bilàmbà byèndè byà dìbàkà, pàvwà bânà bàà tatwèndè mukwàbò bàmùseka ne bàmwèlulwila apu.

⁸¹ Ndekeelu wa byònsò kufikabi ku. . . ndekeelu wa byònsò ditùkù dyena diinà. Kudìvwadikaye cilàmbà cyèndè cyà dìbàkà aci (Kaa!), yèyè yònsò mudìlongòlòle ne mukezùke. Ki bânà bàà tatwèndè mukwàbò bakesè abo kulwa kumwela mu cijèngu bàmba ne: “Èè, ka wêwè kantanyi kakùtàkane wè. Mòna’s, udi mumanyè ne kí ncìvwaye naaci mu meeji to. Yèyè kàvwa mufwànyine kwakula ne. . . kusela nsongààkàjì bu wêwè to.” Kàdi, yèyè wàkadìlongolola, nànsha bishi.

⁸² Ki kwenzekabi ku shòò ku ibaamulòlò, kàdi kubangabo kumuseka ne kumwelulwila. Kwimanayè ànu lwà ku ciibi aku, mwindile, nànsha bishi. Ki yèyè. . . yèyè ne: “Ndìbà kaayi dìvwaye mwambe ne neikale mwab’ewu?”

⁸³ Yèyè ne: “Bwà dìbà kàvwa mwambe to.” Kàdi yèyè ne: “Wàkamba. . . wàkangambila dilòlò dyàkanselaye. . . anyì dyàkangelaye kakanù kàà dibangilangana adi. Wàkamba, wàkangambila ne: ‘Bìvwà ne cyà kwikala bu mu cidimu cimwè kubangila ànu ku mpindyewu.’ Ki bwà cinyi kunshàadile dìbà ànu dìmwè.” Amen, mutùngunuke ànu ne kwindila. “Nkunshàadile dìbà dìmwè, nkushààle tusunsa makumi àsàtu, nkushààle tusunsa dikumi.” Kàdi ki kumusekabò ne kumwelulwila, ne kumwinyikabò mènà ònsò.

84 Kàdi, ndekeelu wa byònsò, ànu pa dîbà mene dyà bwalu kashondo adi, kumvwabo mùvwa lusenga lunyunguluka ludila mu nkatà ya matempu, tubalu twènda tûlwa. Cìvwa mwà kwikala cintu cyà mùshindù kaayi bwà kumòna mukàji-musèla mukesè awu uvwa mudìlongòlòle awu, udyela pambèlù pàà ciibi apu, ne upatukila lwà mu tukanu tujingila kùdì bilòngò byà rose amu, bwà kudyela mu mabòkò à mulùme uvwaye munange awu, bwà kwikalaye bàyendè, bwà kumwambulaye mùshindù awu, ne kusediibwa ne kuyabò babànde pa tubalu.

85 Dimwè dyà ku matùkù aa, mwanèètù, aba bàdì bèlulwila bàmba ne “munsantu mubùnguluki wa mu malaba,” ne—ne “beena mpenta,” ne bintu byà mùshindù awu. . .Tudi bindile, tucìdi ànu ne ndambù wa dîbà mukesè. Bàdi bàmba ne: “Aa, kakwèna dishìilangana ne bìvwaku kwònsò eku nànsha.” Kuditacishi to, kucìdi kutùshàadile ndambù wa dîbà mukesè. Ne mu cikondo cyàkalayàYe aci, Yèyè neikale mwab’ewu. Ne dimwè dyà ku matùkù aa netùbuuke e kuya. Dilongòlòle wèwè ànu! Ikàlà muvwàle Cilàmbà cyà Dibàkà! Patula lwonji lwònsò mu mwoyi wèbè. Bintu byònsò bìdì. . .

86 Tèèlejàayi mùdì Mufùndù ewu ùbadiibwa kaaba aka:

Tùsankàayi ne tucyonkomokàayi, ne tùmupàayi luumù, bwalu dibàkà dya Mwànà wa mùkòòkò dyàkulwa, ne mukàjèndè ukaadi mudìlongòlòle.
(Nwacyùmvù anyi?)

Ne bàakamupà bwà kuwàlayè cilàmbà cyà linà mufinùnùke, cikezùke ne citòòke, bwalu linà mufinùnùke mbwakane bwà bansantu. (Butùmbi kùdì Nzambì!)

Ne kungambilaye mèmè ne: Fùnda ne: Babènèshùibwe ng’aba bàdì babùkìdùibwe ku didyà dyà dibanji dyà dibàkà dyà Mwànà wa mùkòòkò. Ke kungambilaye ne: Aa mmèyi malelèlè à Nzambì.

87 Nànku nekwikale didìsangisha mu kapeepà dimwè dyà ku matùkù aa, mu kalolo aku, mu kalolo mu citùpa cikesè emu. Uh-huh. Shààla wèwè ànu mudìlongòlòle! Ikàlà mudìlongòlòle wèwè mwinè! Pàtulà mu mwoyi wèbè meeji mabì wònsò. Itàbùùjà Nzambì, nànsha kumweka mifitù yà bìshi ne nànsha baseka bìshi ne beelulwila bàmba ne: “Udi mutùpàkàne.” Tungunuka wèwè ànu ne kwikala ne nsòmbelu wa cijilla ne kwikala ne mwoyi bwà Nzambì. Tùngunuka ànu ne kwenda kuya, dîbà nedilwe!

88 Pa nànku, nudi numòna’s, Yèyè ùdì ùmwènèka cyàkàbìdì mpindyewu mu Bwàkabuulwibwà 19:

Paanyimà pàà maalu aa. . .(Paanyimà pàà yèyè mumanè kumòna cikondo cyà Èkèleeziyà.)

Paanyimà pàà maalu aa mêmè kutàngila, ne, m̀onaayi, ciibi. . .

⁸⁹ Mpindyewu, vùlukaàyi, Yone ùcidi ànu mu Paatèmò. Nènku paanyimà pàà yéyè mumanè kum̀ona bikondo bỳonsò byà èkèleeziyà bijike:

. . . Mêmè kutàngila, ne, m̀onaayi, ciibi civwa cyunzulula mu dyulu: . . .

⁹⁰ “Ciibi.” Ciibi ncinyi? Bwàkabuulwibwà 3:8. Mu Bwàkabuulwibwà, nshapità mwi3 ne mvensà wa 8: “Ndi mumanyè byenzedi byèbè. M̀ona, Ndi mutèèke kumpàla kwèbè aku Ciibi cyunzulula cidi muntu nànsha umwe kàyì mwà kukanga, kàyì mwà kukanga ne muntu nànsha umwe kàyì mwà kunzulula to.” Yéyè ki Ciibi! Ciibi! Kilistò ki Ciibi. Wàkamba, mu Yone Munsantu 10 ne: “Mêmè ki Ciibi cyà ku cikumbi cyà mikòòkò.”

⁹¹ Nènku mu matùnga à kale amu, nudi nusangana ne mulami wa mikòòkò ngudi ubweeja mikòòkò yèndè mu cikumbi. Paanyimà ùdi ùyibala ne ùm̀ona ne ỳonsò mmibwele, pashiishe yéyè ùdi ùdyàdija ànu mu ciibi amu. Mubwàbwà kawèna mwà kubwelamù kawùyi mumubiishe yéyè to, anyi mikòòkò yèndè kayèna mwà kupàtuka kayiyi mimusambùkè nànsha. Kaa, mmùshindù mwinè ùdi mikòòkò yidyumvwa mu dikùbiibwa’s wè bwalu mulami wa mikòòkò mmulaale mu ciibi.

⁹² Noà, mu Dipungila Dikùlukulu, wàkiimana mu ciibi cyà bwàtù. Kaa, tèlèjàayi; ndi njinga kwamba cintu kampànda! Wàkiimana mu ciibi ne kuyiisha bantu bàvwa bàmuseka abu kanyinganyinga ne bwakàne. Nènku ànu mu ciibi cimwècimwè mwàkiimanaye amu, muntu nànsha umwe kàvwa mwà kubwela mu bwatu amu kakùyì ku ciibi cimwèpelè aci to. Civwa ànu ciibi cimwè aci ku bwatù abu.

⁹³ Ne kùdi Njila ànu wùmwèpelè! Èyo, Mwanèètù. . . ? . . . Kùdi Njila ànu wùmwèpelè wùdi wùbweja mu Mubidi wà Kilistò. Kùdi Ciibi ànu cimwèpelè ku Èkèleeziyà wa Nzambì udi ne mwoyi, ne Yesù ke Ciibi aci! “Mêmè ndi Ciibi! Mêmè ki Njila, njila udi ulombola ku Ciibi aci awu. Mêmè ki Ciibi cyà cikumbi cyà mikòòkò.”

⁹⁴ Wàkambila cikondo cyà èkèleeziyà eci ne: “Ndi mutèèke kumpàla kwèbè Ciibi cyunzulula.” Wàkambila cikondo cyà èkèleeziyà wa ba-Méthodiste aci, b̀obò kuCikoma nyimà, kuditwà mu bulongolodi. “Kàdi Ndi mutèèke kumpàla kwèbè ciibi cyunzulula.” Mpindyewu, paanyimà pàà bamanè kupeta dijidiibwa, Yéyè wàkamba ne: “Mêmè nèntèkè Ciibi cyunzulula,” mbwena kwamba ne Nyumà Mwìmpè. “Ku Nyumà umwe nkutùdi bẁonsò” (munyi?) “babàtìijìibwe mu Mubidi wùmwè wùdi Kilistò.” Yéyè wàkatèèka mukenji awu kumpàla kwà èkèleeziyà wa ba-Méthodiste kàdi bẁobò kuCisesukabò.

Bàakalwa too ne ku dijidiibwa kàdi kubèngabò Nyumà Mwímpè. Nudi nuvùluka aci anyi? “Ciibi cyunzulula aci.”

⁹⁵ Mmunyi mùdi ubwela mu Kilistò? Ku Nyumà umwe, Nyumà Mwímpè, udi mwikàle Nyumà wa Kilistò. Tudi babwelèmù, kî nku dilabulangana dyà ku cyanza, kî nku dimyaminangana dyà mâyi pa mutù to, kàdi ku dibàtiiza dyà Nyumà Mwímpè umwèpelè nkutùdi bwónsò babàtiijùbwe mu Mubidi wùmwe ne bavwijùbwe baabanyanganyi bàà Mubidi awu. Dibàtiiza dyà Nyumà Mwímpè òmwè mu Ciibi aci.

⁹⁶ Ciibi eci cyàkatèèkiibwa mu Dyulu, Ciibi aci, pààkatàngilàyè muulu wàkamòna Mukalenge Yesù. Tàngilàayi ànu citùpà cyàci cidi cilonda aci. Ciibi aci, Mukalenge Yesù.

...Mémè kutàngila, ne, mònaayi, ciibi cìwva cyunzulula mu dyulu: ne dîyi dyà kumpàla... dîngàakuumvwa òwva... dîyi dyà mpungi...

⁹⁷ Mpindyewu ngonyoonyi yàndàmunyi myaadi. Yone ùwva munkaci mwà kutàngila Paatèmò, nènku mpindyewu nyèwù ùbàndisha mèsù muulu. Bwà cinyi? Yèyè udi mòna cintu kampànda cyènzeka pa buloba apa (bikondo byà èkèleeziyà ebi), mu Bikondo Mwandamutekète byà Èkèleeziyà amu, ne pashìshe paanyimà pàà mumanè kujikija kumòna bikondo byà èkèleeziyà, paanyimà pàà cyòci aci, paanyimà pàà bikondo byà èkèleeziyà bimanè kujika, kuumvwaye Dîyi. Kàdi kubandishaye mèsù mutàngile mu Dyulu ne kumònyaye Ciibi cyunzulula, ne Dîyi dyà kumpàla kudiladi bu mpungi. Èyo, myanda kushintuluka kuumukila ku Paatèmò too ne ku Dyulu.

⁹⁸ Dîyi òwva Dîyi òmwèòmwè dyàkendelà mu bitèekedi byà myèndù byà ngòlò mwandamutekète abi; Dîyi òmwèòmwè adi, Dîyi kadìwva dishintùlùke to. Kàdi, Dîyi, Dìwva penyì pààkaDyùmvwàye musangu wà kumpàla apu? Mbanganyi bàdi bavùlùke, mu cikondo cyà kumpàla cyà èkèleeziyà? Paanyimà pèndè. “Mvwa mu Nyumà mu ditùkù dyà Mukalenge,” Bwàkabuulwibwà 1—1:10. Pa nànkù yèyè... “Mu Nyumà.” Panwikala baswè kufùnda aci mmu Bwàkabuulwibwà 1:10 ne 13 ne: “Mvwa mu Nyumà mu ditùkù dyà Mukalenge, ne mémè kuumvwa paanyimà pàanyi bu Dîyi dyà mpungi ne kudiladi bu cyòna cyà mâyi àbungi. Nènku pangaàkakudimuka bwà kutàngila, ngàakamòna Muntu mwimane munkaci mwà bitèekedi byà myèndù byà ngòlò mwandamutekète.”

⁹⁹ Mpindyewu, paanyimà pàà Yèyè mumanè kumuleeja bwalu busokoka bwónsò bwà bitèekedi byà myèndù byà ngòlò mwandamutekète abu (mwikàle mukwàte mitootò mwandamutekète, ne kafulu kàà nsuki katòoke ku mutù, ne bikwàbò, ne makàsà bu cyàmù cyà kabanda, ne mèsù bu kapyà, bimfwànyi), pashìshe kuumvwaye Dîyi òmwèòmwè adi (Tàngilàayi.) dyàkwila mu Dyulu. Ki kutàngilayè muulu e kumònyaye Ciibi cyunzulula. Kaa! Ciibi cyunzulula mu Dyulu!

Mmunyi munùdi nubwelamù? Ku Kilistò Yesù, Ciibi cimwèpelè aci, Njila umwepèle, kakwèna mûngà njila nànsha.

¹⁰⁰ “Muntu kàna yònsò udi ubàndila ku mûngà njila, ùdi mùmwè ne mwivì ne munyèngi.” Ne mu lusùmwinu lwà ewu wakabwelamù ne wàkasanganyiibwa ku Didya dyà Dibanji kàyì cilàmbà pambidi awu, wàkasanganyiibwa mupiile, ne muswikiibwe ne mweidiibwe mu mîdimà yà pambèlù. Njila ànu Umwèpelè, wa dilwa ku Didya dyà Dibanji. Ngeela meeji mvwa muyiishe pa bwalu ebu kí nkwanji kwenza ntàntà mule to. Dìbà dyònsò didì mubàki. . . Pàdi muntu upeta. . . uselangana mu matunga à kale, bivwa bikèngela bwà kwabanyaye mabiikila yèyè mwinè, bivwa bikèngela bwà yèyè kufila mizàbi yèyè mwinè. Pa nàнку pààkatwilanganàye ne muntu ewu, wa bwalu musòmbe ne ku mèèsà à didya dyà dilòlò. . . Mbanganyi bàdi bavùlùke lusumwinu alu? Bushùwà, nwènù batù babala Bible abu. Nènku kusanganaye muntu kampànda ku mèèsà à didya dyà dilòlò adi kàyì cilàmbà cyà dibàkà pambidi to.

¹⁰¹ Ncinyi aci? Mubàki mwimanè ku ciibi ne bwònsò babwelekù ne dibìikila. “Muntu nànsha umwe kèna mwà kulwa kùdi Taatù kàyì mupicile kùNdi to. Bwònsò bàdi Taatù muMpèeshe, anyi mubiikile, nebàlwe kùNdi.” Ki bóbò bàlwalwà abu, bafila dibìikila dyàbò, kùdi mubàki awu, bwà ne bantu bwònsò biikale bafwànangane. Ki cintu cimwè cidi citàngile ntèndeleeleu mwimpè, wa nkulunkulu, wa Nyumà Mwimpè, ùdi ubavwija bwònsò bafwànàngàne. Nànsha bwòbò babanji anyi bapele, bapika anyi badiikadile, bafìike anyi batòoke, balùme anyi bakàji, bàdi bwònsò umwe mu Kilistò Yesù. Ne mubàki ùvwa wimana ku ciibi bwà kwakidila dibìikila adi, ùvwadika mukwètù awu mùzàbi, bwà babanji ne bapèlè biikale bafwànangane. Ki mùshindù awu ùdibi mu Bukalenge bwà Nzambì, kamwèna baakampànda bàà banène ne tuukampànda twà tukesè to; bwònsò bàdi muntu umwèpelè, bwònsò umwe mu Kilistò.

¹⁰² Mpindyewu, nudi nwela meeji bìshi pààlwà Mubàki ne kusangana muntu musòmbe mwaba awu kàyì Cilàmbà cyà Dibàkà pambidi? Yèyè ne: “Mulundà wanyi, mmunyi mùdi mwà kwikala mubwele kaaba aka?” Kàdi kushààlaye matàma bu byàtà, byàkaleeja ne ùvwa mubwelèle mu njila mukwàbò kakùyì ku Ciibi to. Mmubwelèle ku dididiishi, mmubwelèle ku ciibi cyà ku mfundu. Kàdi kumubiikilaYe ne mulunda, bileeja ne ùvwa cidimba cyà èkèleeziyà: “Mulunda wanyi, mmunyi mùdi mubwele mwab’ewu kùyì cilàmbà pambidi?” Mpindyewu, Yesù ngudi mwambe eci, Yèyè mwine. Ne kubiikilaYe mwimanyi wa ku Ciibi, kwambaYe ne: “Muswikè, makàsà ne byanza.” Nènku wàkeediibwa mu mîdima yà pambèlù piikala myadi, ditwa dyà mikemu, ne disùmakaja dyà mènù. Ki Méyì à Kilistò Sungasunga, (Cyà bushùwà.) “Yèyè wàkeediibwa pambèlù.” Bwalu, mbijaadikiibwe ne, kàyì Cilàmbà cyà Dibàkà to, ùvwa

mubwelele mu njila mukwàbò pa kuumusha ku Ciibi. Bu yêye mwà kwikala mulwile ku Ciibi, nùnkù's mmupetè Cilàmbà cyà Dibàkà.

¹⁰³ Kaa, tèelejàayi eci! Dìbà adi pìikalabi ne Cilàmbà cyà Dibàkà n'dibàtiiza dyà Nyumà Mwîmpè, mmunyi mutwàleejiibwa mu mùshindù mukwàbò? Pìikalabi ne cikondo cyà èkèleeziyà cyà kumpàla civwa ne cyà kulwila ku Ciibi, Kilistò Yesù, kubatijiibwa mu Dìna dyà Yesù Kilistò, kupeta dibatiiza dyà Nyumà Mwîmpè, bwà kuvwàla Cilàmbà cyà Dibàkà, mmunyi mutwàlwila mu njila mukwàbò? Wèwè mulwilè ku ba-Méthodistes, ku ba-Baptistes, anyi ku beena Mpenta, anyi dingumba kàna dyònsò dikwàbò adi, newùswikiibwe ne wèdiibwè mu mîdimà yà pambèlù. Bìkèngela ùlwile kùdì Kilistò Yesù, Njila, Ciibi, Bulelèlà, Mwoyi. Amen!

¹⁰⁴ Èyo, Dìyi òmwèdimwè adi, Bwàkabuulwibwà 21, anyi, Bwàkabuulwibwà 1:10 ne 13. Nènku ndi muswè bwà nwènù kumòna ne, Dìyi dyàkuumvwaye dyàkula nendè òvwa dijìkuke bu mpungi. S'nudi bamanyè mùtù mpungi udila, utù ùfila mwadi mutwè ngwengwengwe. Mpungi ùdi umvwija cinyi mu Bible? Mvità. Dìbà kanà dyònsò dyùdi umòna mpungi ùdila, mu mvità. . . mu cikondo cyà Bible, mwadi wèndè ùvwa ùmvwija mvità, anyi dibuulula anyi cintu kampànda cidi ne cyà kwenzeka.

¹⁰⁵ Mpindyewu, yêye. . . Paanyimà pàà bikondo byà èkèleeziyà bimanè kujika, ne bintu byònsò bilongolola, bilongolola bwà cyàlu cyà nshapìtà mwí4 ewu, bikondo byà èkèleeziyà bikaavwa bijikè. Yêye ùkaavwa mushiyàngàne ne buloba, nudi numòna's. Vùlukaayi ne, Dìyi dyàkaakulà nendè adi, paanyimà pèndè, mu bitèekedi byà myèndù byà ngòlò mwandamutekète, mudimu ùkaavwa mumanè kujika. Nènku mpindyewu Dìyi òmwèdimwè adi òvwa dyàkwila mu Dyulu. Civwa ncinyi? Yêye ukaavwa mumanè kupikula cisàmbà Cyèndè. Mudimu Wèndè wa pa buloba wùvwa mùjikè, ne Yêye ùvwa mu Butùmbi, ùbìikila Yone ne: "Bandila kùneeku!" Uh-hum. Amen! Aci cidi cingumvwija mwà kwela mbilà mu mulàadilu wà Cidimu Cipyacipyà emu. Kaa, ekèlekèle! Ki bwalu mbwòbù abu's. Nwamònu's, mudilongolola: "Bàndila kùneeku!"

¹⁰⁶ Mvità! Eci ndibanga dyà mvità minène; bantu bàakabènga Mukenji wà Nzambi, bàakabènga Nyumà Mwîmpè, Mùsànjeelà wa maèkèleeziyà mwandamutekète. Ewu wàkabenga Mukenji wà ngàsà Wèndè ewu kî nkumushàadile cingà cintu to, ànu cilumbulwidi civwà pabwìpì, byònsò pàvwàYe ùdìlongolola bwà kwìkìkija makenga pa buloba mpindyewu. "Bandila kùneeku nènku Nènkuleeje cidi cilongolola bwà kwenzeka. Bangènzàmpèkààtù babèngi bàà Kilistò, babule Nzambi, Nèngüicikije ciji Cyànyì cìkolè pambidi pààbò."

¹⁰⁷ Tàngilàayi mùdì bwalu. Kaa, bu mutùdi tulonga mu

maadilòlò aa nenùtambe kucyùmva ne nenùtambe kucyùmva díbà dyònsò. Katwèna mwà kupeta bintu byònsò ànu emu to, tudi ne cyà kutungunuka ne kutapa dísu eku ne eku. Mùshindù wikalaci cintu cyà cyènta bwòwà bwà bóbù abu pàadila mpungi wa ndekeelu, ne pàalwanganyiibwa mvità yà ndekeelu, pàayiishiibwa diyisha dyà ndekeelu, pìmbabo musambu wà ndekeelu, nènku tudi twimàna ku Nkwasa wa Cilumbulwidi wa Kilistò. Nebàkwebeje ne: “Bwà cinyi kwàkaWùpeta? Wakenza cinyi ne Mwoyi ungàakakupèsha?” Nebàkulòmbe bwà wèwè kufila kabingilà. Ncinyi díbà adi?

108 Nutù banguumvwe ngimba musambu awu, anyi nguteeta ne:

Ncinyi díbà adi? Ncinyi díbà adi?
Pàabuuludiibwà Mukàndà munène awu,
bwalu nebwikalè cinyi díbà adi?
Pìkala aba bàdì babenga Mukenji
Mwà kukonkiibwàbo bwà kufila kabingilà—
Bwalu nebwikalè cinyi díbà adi?

109 Nenwimane kuntwaku, ànu menemene bu mùdì Mukàndà ewu mufundìbwe emu. Newikale. . .Newimane kuntwaku ne bàkukonke kabingilà. Kaa, cìdì ne difutu kutùdì, mwanèètù wanyi wa balùme, mwanèètù wa bakàjì, mbujitu butwimikila, bu bânà bàà balùme ne bàà bakàjì bàà Nzambi, bwà twètù kudikenketa díbà dyònsò dyà ditùkù. Pòlò wákamba ne: “Ndi mfwa ku ditùkù ne ku ditùkù. Kàdì ndi ne mwoyi, kí mmémè to, kàdì Kilistò ngudi ne mwoyi munda mwànyì.” Nwamònu anyi? Dikenkèta, bwalu kwena mumanyè ne ndíbà kaayi diwàbìkidiibwa bwà kwandamuna Kuulu kwaka to.

110 Mpindyewu: “Wakumvwa Dìyì dyà mpungi.” Èyo. Mònaayi, mònaayi cyákamba Yone, wákamba apa, mu citùpà cyà ndekeelu cyà nshapità wa 1 ewu ne:

. . .dyàmbedi dîyì. . .dìvwa. . .bu mpungi òvwa
dyàkula naanyi; ne dyamba ne: Bandila kùneeku, . . .

Bandila kùneeku! Mvwa munùleeje bikondo byà èkèleeziyà pa buloba; mpindyewu bandila kùneeku, nenkuleeje cintu kampànda cìdì cyènzeka kuulu eku.

111 Nwamònu’s, Kilistò ùkaavwa muumùke pa buloba díbà adi, Ùkaavwa mubànde mu Butùmbi, cikondo cyà ikèleeziyà cimane kujika, bileeja ne Nyumà Wendè ukaavwa mujikije apa. Nènku Yèyè ùkaavwa muyè mu Butùmbi ne ùvwa ùbìikila Yone bwà kubàndayè, ne Wàkamuleeja bikwàbò bìvwa ne cyà kwenzeka. “Bandila kùneeku.”

112 Mpindyewu, tudi tumòna Yone, nshapità mwi2. . .mvensà mwi2. Mònaayi, lùkàsàlùkàsà, Yone wàkasàkidila eci:

Nènku dyàkamwe. . .(Amen!)

113 Kaa, mémè ngenza maalu àmweka bu à lukutukutu, bìdì ne ndi ndyùmva ànu bimpè be. Yone kusàkidilaye ne:

... *dyàkàmwè mvwa nsanganyibwa mu nyumà: . . .*

114 Paùdì umvwa Dîyì dyà Nzambì dyàkula neebè, cintu kampànda cìdì cyènzeka. Amen! Kaa, cyàkakwenzekela mùshindù awu anyi? Cyàkangenzekela, kukaadi bidimu makumi àsàtù ne cimwè, ne kubangila ànu apu ncicyèna kàbìdì umweumwe awu to. Kaa, pàakambàYe ne: “Lwâyi kûNdi, nwènù bwònsò bàdì bàkwàta mudimu mukolè ne bambùle majitu makolè, Mèmè nènnùpèèshè diikisha.” Kunshintululacì.

115 Yone wàkamba ne:

... *dyàkàmwè mvwa mu nyumà: . . .* (Nyumà kaayi? Nyumà Mwímpè. Kaa!)... *Mvwa mu nyumà: ne, mònaayi, nkwaswa wa butùmbi ùvwa mutèèka mu dyulu, ne kampànda musòmbe pa nkwaswa wa butùmbi awu.*

116 Nwamònu’s, Yone ùkaavwa muùmùke pa buloba dìbà adi. Kilistò ùkaavwa mushìye buloba (mu mmwènekèlu wa Nyumà Mwímpè) ne mwàlukile cyàkàbìdì ku Mubidi. Leelù ewu Mubidi awu mmusòmbe kuntwaku bu civùlukilu, bu mulàmbù. Tudi tukafika ku aci patùdì tulonga nshapìtà ewu. Kàdì Nyumà wa Kilistò wàkaalukila bwà kwikala ne mwoyi mu Èkèleeziyà, bwà kwikala ne mwoyi munda mwètù.

117 Mpindyewu, dyàkàmwè paanyimà pàà Yèyè mumanè kuleeja ndekeelu wa cikondo cyà mudimu Wèndè pànu apa, Wàkabànda mu Dyulu, Yèyè ne: “Nènkuleejè cìikalà mwà kwenzeka paanyimà pàà cyòcì eci, paanyimà pàà bikondo byà èkèleeziyà.” Yèyè ne: “Yone, Ncyèna kàbìdì mwà kuyiikidila neebè panshi apu to, bwalu Nkaadi muùmùke panshi apu, Nkàadi mubànde kùnèèku. Banda Naanyi kùneeku!” Amen! “Nènku Nenkuleejè cìikalà mwà kwenzeka paanyimà apa.” Kaa, ekèlekèle! Hmm! Kaa! Mwambwibwe mu cikèènà-kumòna, mwambwibwe mu Butùmbi.

118 Dilabula Dyèndè didi ne cyà kwikala cintu bu cyà Pòlò aci’s. Kolintò Mwibìdì 12:2 ne 4, panwìkala nucifùnda. Kolintò Mwibìdì. . . 2 too ne ku 4. Pòlò wàkambwibwa dìngà ditùkù, mu. . . mu cikèènà-kumòna, yèyè pèndè. Nuvwakù bamanyè nàнку anyi? Ne wàkamòna bintu bivwà bímpè bitàmbe bwà yèyè mene kubyàkula; bidimu dikumi ne binaayi, kàyìku mene mwà kubitèèla to. Nwamònu anyi? Kàdì tèèlejàayi dishiilangana pankacì pààbò.

119 Cyàkamòna Pòlò, bàakamukandika bwà kucyàkula anyi kucyèla patòoke ku bantu. Kaa, ekèlekèle! Ncyèna ngeela meeji ne ùvwa mwà kucyènza to. (Bwalu, kaalwendu kakesè kangàakenza dìngà ditùkù, bwenzeji bwàkù kí mbwanji kungumuka ne kabwàdyàkungumukakù to.) Nwamònu’s, yèyè—yèyè wàkamòna bintu bivwàye kàyì mwà kwamba to. Ngeela meeji ne yèyè kàvwa ne mèyi à. . . wàkambwibwa mu Dyulu diisàtù, nànsha nàнку. Nwamònu’s, mu Dyulu diisàtù.

¹²⁰ Ndishiilangana kaayipu pàakambwibwa Yone ne kumòna Yesù, yéyè úvwa... Yéyè ne: “Biwámònu abi bifunde mu mukàndà ne úbyalùjè, ùbitùmine maèkèleeziyà.” Bàakakàndika Pòlò bwà kwakula, kàdi Yone yéyè bàakamulòmba bwà kubifunda mu mukàndà bwà byàmòna mwà kupweka mu bikondo byònsò. Kaa, ekèlekèle! Mbibuulula patùdi twakula apa, bwà kubuuludiibwa mu matùkù à ndekeelu aa. Kabyàkabuuludiibwa mu matùkù èndè nànsha, mbibuulula mpindyewu mutùdi twenda tuya naabi emu.

¹²¹ Kaa, kàdi mònaayi, Yone, mwikale mwambwibwe dyàkámwè paanyimà pàà cikondo cyà èkèleeziyà, úvwa cimfwànyì cyà Èkèleeziyà mwambwibwe. Dyàkámwè paanyimà pàà cikondo cyà èkèleeziyà cimane kujika, Cikondo cyà Èkèleeziyà wa Laòdikiyà eci, dībà adi ki dilwalwà Dyambwibwa. Èkèleeziyà ùdi ùbànda bu mwàkabànda Yone amu, mu Bwikadi bwà Nzambì. Kaa, ekèlekèle! Yoyòyò! Aci's cidi cinyukusha musùkà wànyì. Mwambwibwe, ku Dyambwibwa dyà Èkèleeziyà! Ki kwambaYè... Mwaba ewu, Mukàndà wa Bwàkabuulwibwà, mufunda, nwamònu's, ku ndekeelu kwà cikondo cyà èkèleeziyà.

¹²² Mpindyewu, ndi ne kantu kampànda mwab'ewu kàndi muswè kutòokeshà bwà cintu kampànda cyà kale citù citàcìshètàcìshe beena Kilstò bààbúngì ntàntà mule. Nènku mvwa ndyàmbidila leelù ewu ne, pàmvwà ndonga, mfùnda Mifùndu, bwà kujandula mènà ne meekala mashiilèshiiilàngàne ne bikwàbò. Netùbwelemu paanyimà pàà katancì kakesè, myanzankòngòlò ne bimfwànyì, ne bikwàbò. Mvwa munkaci mwà kufùnda Mifùndu eyi bwà ngaamòna mwà kuyitàngulula ne kutàpakù dísù, bu mèmè... patùdi twenda tutùngunuka apa. Bwalu, pa ciibidilu, bu mèmè mwà kwakula pa cintu kampànda cyà mùshindù ewu, ndi mufwànyìne... mbifwànyìne kwikala bishiilàngàne, ndi mufwànyìne kuteeta kucimanya ku mwoyi. Kàdi mùshindù ewu, paùdiku ànu ne ndambù mukesè wa dībà, ndi njinga kutàpakù dísù bwalu cidi cyenda mu Mifùndu mwònsò, mpàla ne nyimà.

¹²³ Mpindyewu, mu Maatàayi 16:13, tudi tusangana cyòci eci, panwikalà nufùnda Mifùndu. Maatàayi... Wèwè muswè kwalukila... wèwè muswè kutàngilaku, èyo, Maatàayi 16:13. Cidi... Kaa, netwàlukileku bwà kucibala, nènku dībà adi netùcumvwe bímpe menemene. Maatàayi nshapità wa 16, ku mvensà wa 13. Tèelejàayi ne ntèmà yònsò mpindyewu patùdi tubala 16:13 ne: “Pàakalwà Peetèlò...” Anyì:

Pàakalwa Yesù ku nseke ya ku Cesarée wa Philippe, wàkakonka bayiidi bèndè, wàmba ne: Bantu bàdi bàmba ne... Mèmè Mwànà wa muntu awu ndi nganyi?

Ki bòbò ne: Bàmwè bàdi bàmba ne... wèwè udi Yone Mubàtiiji: bàmwè ne, Eliyà; ne bakwàbò ne, Yelèmiyà,

ne, anyi umwe wa ku baprófeta.

Yéyè kubàmbila ne: Kàdi nwènù nudi nwamba ne mèmè ndi nganyì?

Ki Simonà Peetèlò kwandamuna e kwambayè ne: Wèwè udi Kilistò, Mwànà wa Nzambi udi ne mwoyi.

Ki Yesu kwandamuna e kumwambila ne: Udi mubènèshùbwe, wèwè Simonà Bàà-yona: . . .mubidi ne mashi kî mbìdì bikubuulwileci wèwè to, kàdi Taatù wanyì udi mu dyulu.

Ne ndi nkwabwila . . .wèwè ne: Wèwè udi Peetèlò, ne pa lubwebwe elu Nèngùbakilèpu èkèleeziyà wanyì; ne biibi byà ifernò kabyàkumutàmba bukolè to.

Nènku mpindyewu . . .Nènku nènkupèèshè nsapi yà bukalenge bwà dyulu: ne cyònsò ciwàswika pa buloba neciswikùbwe mu dyulu: . . . cyònsò ciwàsùululà pa buloba necisùuludiùbwe mu dyulu.

Pashùshe kukàndikaye bayiidi bèndè bwà kabùkadi muà kwambila muntu nànsha umwe ne yéyè ùvwa Yesù Kilistò awu to.

¹²⁴ Tèèlejàayi ne ntèmà mpindyewu. Èyo. “Bwà ku dîbà adi kubanga . . .Kuumukila ànu ku dîbà adi kubangaYe . . .” Ndi muswè kwangata mukwàbò, nudi mwà kutungunuka ne kuwùbala, kwangata mvensà wa 28 ewu, bwalu nudi mwà kubala yònsò yidi mishààle ayi panwàya ku mèènù.

Bulelèlà—Bulelèlà Ndi nnwàmbila ne: Kùdi bàmwè biimàne kaaba aka, biikalà kabàyi mwà kulabula lufù to, too ne pààmònabo Mwànà wa muntu ùlwa mu bukalenge bwèndè.

¹²⁵ Kaa, anjì elààyibì meeji ku bwalu abu! “Bàmwè biimàne mwaba ewu, bàmwè biimàne mwaba ewu, kabààkulabulaku lufù to too ne pààmònabo Mwànà wa muntu ubwela mu Bukalenge Bwèndè.” Dîyi kaayi’s wè! Mùshindù ùvwa mudyùdi muswè kucìbakula bwà kuleeja ànu mùshindù ùdiye cinyònga, nwamònu’s. Mùshindù ùdiye muswè kukwàta ku aci, nènku cyènzeka kàdi kabàyi bàngulamù mpasu nànsha. Nwamònu anyi? Èyo.

¹²⁶ Paanyimà pàà ditonda dyà Peetèlò dyà lubwebwe, citùdi bamanyè ne ditonda dyèndè didi . . .Yéyè ùvwa mwà kwibakila Èkèleeziyà Wendè pa lubwebwe lùmwèlùmwè alu. Kí m’Peetèlò, mwikale kaa dibwe kakesè, mùdi Kàtòlikè kàà cyena Loomò kateeta kucyàmba amu to. Kàdi ditonda dyà Peetèlò dyà Dibүүлula, kî Èkèleeziyà nyéyè awu. Nzambi nèàCibuulule; kaciyi ditonda dyà muntu ewu to, bwalu paanyimà yéyè wàkatwà cimpingà. Kí nditonda dyà Yéyè mwikàle Mwànà wa Nzambi to; bwalu bàvwa bamanyè ne Yéyè ùvwa Mwànà wa Nzambi, Peetèlò ngudi mucyàmbè ànu cyanàànà. Kàdi ciwaci,

cìwva, Dibuulula dyàkabuuludiibwa kuumukila mu Dyulu ne Yèyè ùwva Mwànà wa Nzambi adi. Yèyè ne: “Mubidi ne mashi kî mbidì bikulongèsheci to, kàdi Taatù Wanyì udi mu Dyulu mmukubuulwileci. Nènku pa lubwebwe elu, lubwebwe lwà ditonda alu, Nèngìibakilèpu Èkèleeziyà Wanyì, ne biibi byà iferno kabyàkunyanga . . . kabyàkuMutàmba bukolè nànsha.”

¹²⁷ Ndi ntèkemenà ne katwèna tucipicisha dîbà bikolè menemene mpindyewu mwab’ewu to, bwà twàmòna mwà kubwela mu eci. Nènku tudi baswè kumòna mùdici cìpòngolokela mu muntu. Mbwalu bulonda bulenga mwab’ewu mene bu twètù ànu mwà kukùfika. Èyo. Èyowà, ditonda dyà lubwebwe, dyà ne Peetèlò ùwva . . . Ùwva mwà kwibakila Èkèleeziyà Wendè pa ditonda dyà Peetèlò. Yèyè ne: “Bàmwè bàdi biimàne mwab’ewu kabààkulabula lufù to too ne pàmònabo Mwànà wa—wa Nzambi ùlwa mu Bukalenge Bwèndè.”

¹²⁸ Mpindyewu, vùlukàayi ne, Yèyè wàkaakula ne “bàmwè.” Aci’s cìwva citàmbe ne umwe, kî mmwòmò anyi? Bàmwè s’mbifwànyine kwikala bààbùngì ne: “bapite pa umwe.” Kàdi mpindyewu tàngilàayi, bayiidi Bèndè bwònsò bàvwa biimàne mwaba awu, ne Yèyè ùwva ùkonka yònsò wa kùdìbo ne: “Nudi nwela meeji kaayi bwà eci? Ne nudi nwela meeji kaayi bwà *cyàcyà*?” Kàdi Yèyè wàkamba ne: “Kùdi bàmwè bàà kunùdi biimàne mwab’ewu, bàmwè biimàne mwab’ewu, biikala kabàyi mwà kulabula lufù to too ne pàmònabo Mwànà wa muntu ùlwa mu Bukalenge Bwèndè.” Kaa, ekèlekèle! Dìyi kaayipu’s wè! Elàayibi meeji tǔng, dyàkambiibwa kukaadi bidimu binunu bibidì.

¹²⁹ Nediikale . . . difwànyine . . . Dìyi dyà Nzambi kaditukù dyà kadiyi dipangila anyi? Dìyi dyònsò didiYe wàmba nedeyenzeke anyi?

¹³⁰ Mpindyewu, twètù baswè, tùbuululàayi dîbà adi mu nshapità wa 17 wa Maatàayi ki udi ulonda awu. PààkangataYe . . . Matùkù makesè paanyimà pàa aci, Wàkangata Peetèlò, Yakòbò, ne Yone, kubànda naabo ku mukunà, pa luseke, bwà kwikalabo bantèmù. Peetèlò, Yakòbò, ne Yone; kàdi bààkamòna Bukalenge bwà Nzambi bùlwa mu bukolè, bààkamòna dilwa dyà Bukalenge bwà Nzambi bwambùlùdiibwe. Amen! Kaa, bààkatwàdiibwa mu dibandila dyà Bukalenge bwà Nzambi bwambùlùdiibwe mùdiBu bùlwa, dibwela mu cyàlu dyà Bukalenge bwà bidimu cinunu. Kudyànjlilabo kumòna dyambuludiibwa.

¹³¹ Kùkaadi cikondo kampànda . . . musùmbà wa bambi, Oral Roberts ùwva umwe wabò. Cecil B. DeMille, pàakafundàye *Mikenji Dikumi* eyi, wàkabìikidisha Mwanèètù Shakarian, Mwanèètù Roberts, bayiishi bààbùngì mu ditùnga dijimà, muiishi kanà yònsò ewu ùwva mwà kulwa, ne kubàbìikidisha bwà kubwelabo mu studio bangabanga ne mukàbà wà

bindidimbi awu kupàtudiibwawù, ne kubalekela bàdyànjila kuwùmòna bangabanga ne kuwùleejabo ku bantu bwònsò, pàvwàbo bafucisha ndola makumi àbìdì ne yìtaanu ku ticket. Kàdi yéyè. . . Kumònabo dyambuludiibwa dyàwù, bwà bààmòna mwà kufila wabò mmwènenenu bwà ne kùdìku mwà kwikala didyula kampànda pa bwalu abu anyi cìvwà cìfwànyine kwambiibwa, ne bikwàbò. Bààkawùmòna kumpàla kwà bantu bwònsò kuwùmònabo.

¹³² Ki Yesù kwamba ne: “Bàmwè bàà kunùdì bàdì biimàne mwab’ewu” (Amen!) “kabààkulabula lufù to too ne pààmònabo Bukalenge bwà Nzambi bùlwa mu bukolè,” anyi ne: “kumòna Mwànà wa muntu ùlwa mu Bukalenge Bwèndè,” èyowà’s. “Kumòna Mwànà wa muntu ùlwa mu Bukalenge Bwèndè!” Ndambù wa matùkù paanyimà pàà cyòci aci, kwangataYe Peetèlò, Yakòbò, ne Yone, ne kubandabo kuulu kwà mukùnà, ne kwòkò aku Yéyè kushintuluka mpàla kumpàla kwàbò. Dìbà, mu dibàlakana dyàdì, kadivwa difwànyine kwikala bu bilàmbà Byèndè bìvwaYe muvwàle to. Mmisangu bùngì kaayi yitùdì bacilenge mu nsumwinu, netwende naaci mu Bible mujimà’s!

¹³³ Udi mwà kwangata cyena-bwalu cìmwè cyà mu Mifùndu ne kuswikakaja naaci Bible mujimà awu pàmwè. Èyowà’s, mukalenge. Mutanta nànsha wà mafi mwaba nànsha umwè! Cyònsò cilamika ne bukolè bwà Nzambi. Dyabùlù kavwakù mwà kudifindamu to nànsha bu yéyè ne cyà kudifindamu, Neyà bushùwà. Kèna mwà kubwela kùdì bantu bàà cijila abu bàdì bafìle bujaadiki bwàbò kuntu kwàka ne biitabùùje Bukalenge bwà Nzambi, ne bangate Mufùndu ònsò ne baÙlamike ne bukolè bwà Nyumà Mwìmpè, kuÙsukula mu Mashi; bàà pa buloba kabèèna mwà kubwelamù to, dyabùlù kèna mwà kubwelamù to. Mbafwè, mwoyi wàbò mmusokoka mu Kilistò ku Cìtampì cyà Nzambi, ku Nyumà Mwìmpè. Mmuniyì mùdì dyabùlù mwà kubàtácìsha? Hmm! Ki bòbò abu, mu ngiikàdìlù ewu mpindyewu.

¹³⁴ Lwà mu mwaba awu, dìbà adi, kumònaye Dilwa adi, anyi dyambuludiibwa. Nènku cyà kumpàla cìvwà cinyi, kumònabo. . .cintu cyàkamònaye? Cintu cyà kumpàla cyàkamònaye mu Dilwa adi cìvwà m’Mòsà, wakaleeja bansantu bafwè bàvwà ne cyà kubùishiibwa ku lufù. Eliyà ùvwa mwimane mwaba awu.

¹³⁵ Kaa, ndi muswe bwà numòne cìikalà mwà kwenzeka. Kùvwà Mòsà, dyàmbedi; aci’s mbikondo byònsò bisambòmbò ebi bìvwàbo balààle, bikondo bisambòmbò byà èkèleeziyà. Ki ng’ànù aci to, kàdi Eliyà ùvwamù; mùsànjeela wa ditùkù dyà ndekeelu, ne kasumbù kèndè, kàà bashintùlùdìibwe, Bambwìbwe. Amen! Mpindyewu mu cikondo cìlwàlwa; bindìle Dilwa adi.

¹³⁶ Nènku ncinyi cìdìbo bènza bwònsò. . .? Bwònsò bàvwà

badisange Nendè. Kaa, ekèlekèle! Cìvwa ncinyi aci? Mulayi Wèndè kùdi Peetèlò, Yakòbò, ne Yone, kuulawù. Ncyà bushùwà. Bwalu Yèyè wàkamba ne: “Bàmwè bàdi biimane mwab’ewu kabààkulubula lufù to too ne pààmònabo Mwànà wa muntu ùlwa mu Bukalenge Bwèndè,” ne bàakamòna didyànjlila kuleejibwa dyàci. Pashìishe paanyimà pàà cyòci eci, paanyimà pàà dibìikà dyà ku lufù . . .

¹³⁷ Ndi muswè kunùtwàdila cikwàbò cintu; paanyimà pàà Yesù mumanè kufwà, mujiikìlbwe, mu Yone Munsantu 21:20. Badyudi kampànda kutwàdijabò eci mu matùkù à mbangilu awu. Ànu patùcidi mu dìleesònà apa, twanji kucitòokeshakù. Mu Yone Munsantu 20:21, Yesù wàkatwilangana ne bayiidi Bèndè, kubàdiisha ne mishipa ne dyàmpanà pa kapyà. Nènku bu muvwàbo babànda ne mwelelu wà musùlù, Yone kuMweyemena mu cyàdi; ki Peetèlò kwelaye lukonko, wàmba ne: “Ncinyi ciikala mwà kwenzekela muntu ewu?” Yesù ùvwa munange Yone, Yone ùvwa muntu wa dinanga. Ne kwambaye ne: “Ncinyi cyènzekela muntu ewu? Ngiikàdilù wèndè neikale bishi? Matùkù èndè àcilwalwà neikale bishi?”

¹³⁸ Ki Yesù kubàambila ne: “Bwènù mbwèpì bu yèyè mwà kushààla too ne pàNgàälwà, too ne pàNgàälukilà? Ncinyi ciinè aci?”

¹³⁹ Nènku bayiidi bàakenza cilèmà, kwambabo ne “Yesù wàkamba ne—ne—ne ‘yèyè neàshààle ne mwoyi too ne ku Dilwa adi.”

¹⁴⁰ Kàdi Yesù kàvwa mwenze cilèmà nànsha cimwè to. Ànu kaaba aka mu Bwàkabuulwibwà, nshapità mwi4, Kilistò wàkalama Dìyì Dyèndè! Wàkabandisha Yone mu Dyulu ne kwambulula cintu cijimà. Butumbi’s wè! Yèyè—yèyè kumòna cyà mbangilu. Wàkacimòna ànu byenzè bu ùvwa musòmbele pa buloba ne kumònaye bikondo byònsò nkòong byà èkèleeziyà mwàkenzekabi, ne ku dilwa dyà Mukalenge, Mukànda mujimà wà Bwàkabuulwibwà. Kaa, ekèlekèle!

¹⁴¹ Nudi numòna mùdi milayi Yèndè kayiyi yà yìpangila anyi? Mpindyewu, udi musungùdiibwe. . . Yakòbò bwà kwenza aci; Yone, yònsò wa ku bakwàbò abu; kàvwa mene mufwànyine kulekela bwà Pòlò kucimòna to, anyi kucyàmba, anyi cintu nànsha cimwè to.

Yèyè ne: “Bwènù mbwèpì bu yèyè mwà kushààla too ne pàNgàälwà?”

¹⁴² Nènku bu mùvwabi ne bàakamba nànkù, Yèyè wàkasungula Yone ne kubànda nendè kuulu ne kumuleeja cintu cijimà kumpàla mene kwà kufwàye, byenze ànu bu ne wàkamòna cintu cijimà aci. Kumuleejaye cìvwaci ne cyà kwikala! (Mwanèètù Pat, aci kì ncilenga anyi?) Kaa, nwamònu’s, kumwambulaye buludi. Ànu apa mene, nshapità mwi4 ku mvensà mwi2, ùdi ucijaadika. “Wàkamuleeja bintu byàkadiku, bìdiku, ne

byàlwa.” Yèyè wàkamuleeja cikondo cyà èkèleeziyà, dilwa dyà beena Yuda, dipòngolola dyà bipùpù, Dyambwibwa, Dilwa dyà cyàkàbìdì, ne Bukalenge bwà bidimu cinunu, ne Cisòmbedi cyà Cyendèlèlè cyà Basungila Bèndè; byenze ànu bu ne ùvwa mupicile mu cintu cijimà aci, ne mucimòne cyenzeka cyònsò. Nwamònu anyi? Nwamònu anyi? Wàkabànda nendè ne kumuleeja mu—mu—mukàbà ùvwaYe munkaci mwà kwenza, kumuleeja dyambuludiibwa dyà cintu cijimà. Kaa, ekèlekèle!

¹⁴³ Mmwambwibwe. Muwùje mulayi Wèndè mu—mu Bwàkabuulwibwà 4:2. Kumpàla kwà lufù lwèndè wàkambwibwa mu Nyumà ne kumòna bintu byenze ànu bu ne mmubilenge ne byanza. Yèyè—yèyè wàkacimòna cyònsò cyàmbuludiibwa. Ki kumònaye, mu cikèènà-kumòna, ànu menemene cìvwà cìfwànyine kwenzeka ne cyàkenzeka mene pa buloba kubangila ànu ku cikondo aci too ne ku dilwa dyà Mukalenge Yesù. Kumuleejaci mu cikèènà-kumòna.

¹⁴⁴ Ki pashìshe bayiidi. . . anyi muntu nànsha kàakambaku ne Yèyè ùvwa mwambe ne Yèyè nealwe cikondo aci to. Wàkamba ne: “Bwènu mbwèpì bu, (mu ngaakwilu mukwàbò), bu yèyè mwà kushàala too ne paNgàalwà?” Pashìshe kumubandishaYe ne kumwambulwila ànu cintu aci ne kumuleeja cìvwà ne cyà kwenzeka. Kaa, ndi ànu munange aci. Hmm. Kaa, ekèlekèle!

¹⁴⁵ Mònaayi mpindyewu, twanjaayi kumòna ne eci cìvwà cinyi:

*Ne dyàkàmwè mwà nsanganyibwa mu nyumà:
nènku, mònaayi, nkwasà wa butùmbi ùvwa mutèèka mu
dyulu, ne muntu musòmbepù, pa nkwasà wa butùmbi.*

¹⁴⁶ Kùvwa “Dìyi” dyàkamubiikila. Kaa, Dìyi adi’s wè! Kaa, ncyèna mwà kulekela aci to, Dìyi adi dyà Kampànda awu paanyimà pèndè. Pashìshe kukenzakanaye mwaba awu, ne kumuleejaYe bikondo byònsò byà èkèleeziyà, bwalu ùvwa mwimàne mu bikondo byà èkèleeziyà, bitèekedi byà myèndù byà ngòlò mwandamutekète. Pashìshe kumvwaye Dìyi paanyimà pàà bikondo byà èkèleeziyà bimane kujika; Dìyi kuumuka pa buloba, kubànda. PààkabwelaYe mu Butùmbi, wàkaMuumvwa wàmba ne: “Bandila kùneeku! Nènkuleejè cùkala mwà kwenzeka kubangila ànu ku mpindyewu.” Kaa, ekèlekèle!

¹⁴⁷ Dìyi adi! Twakulàayiku bwà Dìyi adi mu kasunsa kàmwè; ndi ne yimwè Mifùndu mifùnda kaaba aka. Tuyaayi ku Tesàlònìkà wa Kumpàla 4, nènku tèelejàayi ànu mwab’ewu cidi Dìyi edi ne cyàkwamba. Kaa, twètù bwònsò’s tudi bamanye cidiDi dijinga kwamba, kakùyì. . . kumpàla kwà twètù kucibala, kí mmwòmò anyi? Tudi bamanye ciikalà mwà kwenzeka. “Mpungi wa Nzambì neadile ne bafwè mu Kilistò nebàbiikè.” Ncyà bushùwà anyi? Wèwè udi ucifùnda, mu Tesàlònìkà wa Kumpàla 4:16 ne 17: “Dìyi,” Dìyi adi divwa Dìyi dyà Kilistò. Ncyà bushùwà anyi? Dìyi dyà Kilistò!

Bwalu. . . mpungi wa Nzambi neàdile, ne bafwè mu Kilistò nebàbũke dyàmbedi:

. . . twètù bàdi ne mwoyi ne bashààle netwàmbwũbwè muulu pàmwè naabò. . . bwà kutwilangana ne Mukalenge mu mpeepèlè: ne kwíkala ne Mukalenge kashidi.

148 Dìyì òm̀wè̀dìm̀wè̀ dyàkabiikila Yone ne: “Bànda,” adi Dìyì òm̀wè̀dìm̀wè̀ dyàkambila Yone ne: “Bànda,” ndyòdì Dìyì òm̀wè̀dìm̀wè̀ dyàbiikila Èkèleeziyà d̀ngà ditùkù (Amen!), dibiikila Èkèleeziyà.

149 Kàbìdì, Dìyì òm̀wè̀dìm̀wè̀ dyàkabiikila Yone bwà kubànda adi, ndyòdì Dìyì òm̀wè̀dìm̀wè̀ dyàkabiikila Lazàrò bwà kupàtuka mu lukità, Dìyì òm̀wè̀dìm̀wè̀ dyà mwarkanjèlò adi. Kilistò ki Dìyì dyà mwarkanjèlò: “Dìyì dyà mwarkanjèlò,” nwamònu’s. Kaa, Dìyì dyà mpungi dyà Kilistò dyàkabiikila Yone bwà kubànda adi, n’Dìyì òm̀wè̀dìm̀wè̀ dyàkabiikila Lazàrò. Nuvwaku bamòne ku lukita lwà Lazàrò, Yèyè wàkaakula ne Dìyì dikolè. (Kabiyi ànu wàm̀ba ne: “Lazàrò pàtukà,” to) “Lazàrò, pàtukà!” Dyàkamubiikila bwà kupatuka mu bafwe.

150 Ki kwandamunayè ne: “Ki mèmè ewu.” Nènku kupàtùkayè ku bafwè, paanyimà pàà yèyè mumanè kufwà ne mubidi wèndè mubolè.

151 Dìyì òm̀wè̀dìm̀wè̀ dyàkambila Yone ne: “Bàndilà kùneeku, Nènkuleeje bim̀wè̀ bintu bìdì pabwìpì ne kwenzeka.”

152 Dìyì òm̀wè̀dìm̀wè̀ diikala mwà kudila pààbiika bafwè mu Kilistò apu: “Bwalu mpungi . . .” Mpungi! Mpungi ncinyi? Dìyì dyà Kilistò, Dyòdì òm̀wè̀dìm̀wè̀ dyàkadila ne kumubiikila bwà kubàndayè adi. Wàkumvwa Dìyì bu mwadi wà mpungi dyàm̀ba ne: “Bàndila kuulu eku!” Nudì numòna mwikalà dibiikà dyà ku lufù anyi? Nebiikalè mu katanci, mu mubũnyi wà disù. Dìyì dyà didila dijìkũke adi, nènku Yèyè neàbiikile Èkèleeziyà, dibiikila ne: “Pàtukàayi muntwamu.” Dìyì dinène didì dibiikila adi. Nzambi, nkwacisheku bwà kuDyumvwa ditùkù adi.

153 Ànu m̀nkaadi mwambambe misangu yàbũngì. . . Ndi mumanyè, bu muntu wa cifwàkà, Rodney, ndi mumanye ne kùdì ciibi cinène cifiike citèèka kumpàla kwànyì, cìbiikidiibwa ne lufù. Musangu wònsò wùdì mwoyi wànyì wùtuuta awu, ndi ntàm̀ba kuseemena pabwìpì ne ciibi aci. Òm̀wè̀ dyà ku matùkù nengìikale ne cyà kubwelamù. Kàdi ncyèna muswè kubwelamù bu muntu mutulùmùke, ndilakana ne ngeela mbila to. Ndi muswè kubwelamù, mudijìngile mu mizàbì yà bwakàne Bwèndè, mumanyè eci: ne ndi muMumanyè mu bukolè bwà dibiikà Dyèndè dyà ku lufi; bwà ne òm̀wè̀ ditùkù pààbiikilaYe, nempatuke munkaci mwà bafwè; pààmbiikilaYe bwà kumwènèka mu Dyulu, pàadila mpungi wa Nzambi ne pààbiika bafwè mu Kilistò, mèmè mwikale ne mwoyi, nèshintulukè mu katanci, mu mubũnyi wà disù, ne nenyè ne

bàdì bashààle abu, muulu bwà kutuutakeena ne Mukalenge mu lupeepèlè. Díyì dyà mpungi, mwadi mujikùke, mukolè. Hmm. Kaa, nebiikale byà mwomùmwe, byà mwomùmwe ne ku Dilwa Dyèndè.

¹⁵⁴ Kakwèna mwadi mulubidile pa Bwalu abu to. Kakùvwa cintu nànsha cìmwè cilubidile kùdì Yone to pààkumvwàye Díyì adi ne: “Bànda kùnu!” ki kubàndayè. Amen.

¹⁵⁵ Pàvwa Lazàrò, mu bafwè, mu lukità; ne musùukà wèndè, mu lwendu lwà matùkù ànaayi mwaba kampànda, ncyèna mumanye kuvwawu to, ncyèna ngeela meeji ne muntu nànsha umwe wa kutùdì eku mmumanye to. Kwònsò kuvwawù aku, kabyàkashintulula cintu nànsha cìmwè to. Wākabiikiila ànu ne díyì òmwè kùdì muntu uvwa misàndà yà mu dikòbà munkacì mwà kudyà mubidi wèndè; ùnunka, mu lukità amu. Mpungi uvwa udila mujikùke awu kwambaye ne: “Lazàrò, pàtukà!” Ki muntu awu, mufwè ne mubolè, kudinyùkushayè ne kupàtùka mu lukità, wenda wènda. Kakwèna cintu cilubidile nànsha cìmwè pa bwalu abu to, kī mmwòmò anyì, bānà bèètù? Kamwèna dilubidila to!

¹⁵⁶ Ncintu cìmwècìmwè aci dilòòlò edi, pàdì Díyì dijìkùke dídila dyàmba ne: “Ngènzàmpèkààtù, nyingàlálà, Nènkupèèshè Mwoyi wà Cyendèlèèlè.” Nyingàlálaayi, muntu ne muntu wa kunùdì, nubatiijibwe mu Dìna dyà Yesù Kilstò bwà dilekelediibwa dyà mpèkàatù yènu, nènkù nenùpetè kupà kwà Nyumà Mwìmpè. Ki dibiikila ndyòdì adi. Kakwèna cintu nànsha cìmwè cilubidile pa Bwalu abu to.

¹⁵⁷ Mémè ndi ntemù wa ne Bwalu abu mbulelèlè. Kùdì bantemù bakwàbò, milliyò ne milliyò pa buloba bujimà leelù ewu, bàdì bàjaadika ne m’Bulelèlè. Pàdì Bible ùlwa, Mèyì à Nzambì, Díyì dyònsò dyà Nzambì m’mpungi. Mwadi wònsò wà Díyì ùdì mpungi, mpungi wa Èvànjeeliyò. Nènkù padiYe ùdila, m’Bulelèlè. PààkambàYe ne: “Yesù Kilstò, umwèumwè awu makèlèlè, leelù, too ne kashidi,” kakwèna cintu nànsha cìmwè cilubidile pa Bwalu abu to. Yèyè udi umwèumwè awu! Èyowà’s, mukalenge.

¹⁵⁸ “Nyingàlálaayi, nubatiijibwe mu Dìna dyà Yesù Kilstò, nenùpete kupà kwà Nyumà Mwìmpè.” Cintu nànsha cìmwè cilubidile pa Bwalu abu.

¹⁵⁹ “Ewu udi umvwa Mèyì Àànyì ne witabuujà Ewu wàkaNtùma ùdì ne Mwoyi wà Cyendèlèèlè. Ewu udi ungiitabuujà Mémè, nànsha byòbì ne mmufwè kàdì neikale ne mwoyi. Ewu udi ne mwoyi ne ungiitabuujà Mémè kààdyàkufwàku to. Udi witabuujà aci anyì?” Kakwèna cintu nànsha cìmwè cilubidile pa Bwalu abu to: “Yèyè neikalè ne mwoyi!”

¹⁶⁰ “Ewu udi udyà mubidi wànyì ne ùnwa Mashi àànyì ùdì ne Mwoyi wa Cyendèlèèlè, ne Mémè nèmmujuulè kàbidì ku

ditùkù dyà ndekeelu.” Kakwèna cintu nànsha cimwè cilubìdilé pa Bwalu abu to; nànsha cimwè; Cìdi mwadi musungùlùke.

¹⁶¹ Kaa, ndi muCimanyè, ngààkaCyùm vwa cidilé mu mwoyi wànyi mukwàte ne byà luse wà cyena Irlande ewu ditùkù kampànda, mèmè, ngènzàmpèkààtù mukesè wa kale. Mmuni mùvwàci mwà kwenza bwànyi? Kàdi ngààkiitabuujà ne Cìvwa mwadi musungùlùke, mèmè kuCìitaba. Mèmè ndi ntemù wa ne Cìdi bulelèlà.

¹⁶² Dìngà ditùkù Yèyè neàbìikile kàbìdi, netùpàtùkè mu buloba. Bwalu kakwèna cintu cilubìdilé pa bìdi bitàngilà mpungi *awu* to. Èyowà’s, mukalenge. Èyowà’s, mukalenge, kakwèna mwadi mulubìdilé to, dībà kanà dyònsò.

¹⁶³ Yèyè ùdi ùdila leelù ewu pàdiYe ùtùbìikila, bìdi ànu byà mwomùm wè pàdiYe ùtwàmbila cintu kanà cyònsò.

¹⁶⁴ Mpindyewu, twàlukilàayi ku mvensà awu:

Ne . . . mōnaayi, nkwasà wa butùmbi wàkatèèkiibwa mu dyulu, (mvensà mwi2) ne muntu ùvwa musòmbepù.

¹⁶⁵ Mōnaayi ne: “Nkwasa wa butùmbi,” Yèyè musòmbè pa Nkwasa wa butùmbi. Kàvwa kàbìdi mupingane mu bitèèkedi byà myèndù mpindyewu, pa buloba to. Dyambwibwa dikaavwa dilwe. Ùvwa mu Butùmbi, musòmbè pa Nkwasa Wendè wa butùmbi. Ndi muswè bwà numòne kwinshi eku, netùsangane mene mu nshapità mwi5 ne, kacìvwa Nkwasa wa luse to. Kacìcìvwa Nkwasa wa luse kàbìdi to, cìvwa Nkwasa wa cilumbulwidi. Kacìvwa Nkwasa wa ngàsà to, cìkaadi Nkwasa wa cilumbulwidi bwalu kapyà ne mikenyi ne makùbàkùbà bivwa bipàtukamù; kaciyi kàbìdi luse to, luse ndujike, cikondo cyà Èkèleeziyà ncijike. “Ewu udi mukooyikè àtùngunuke ne kwikala mukooyikè; ewu udi mwakàne àtùngunuke ne kwikala mwakàne; ewu udi wa cijila àtùngunuke ne kwikala wa cijila,” kacìcyenà kàbìdi Nkwasa wa luse to.

¹⁶⁶ Dilòlò edi, Mashi àdi pa Nkwasa wa butùmbi awu ne n’nkwasà wa luse bwà ngènzàmpèkààtù yònsò udi ukeba luse. Kàdi mu ditùkù adi, kaciyàkwikala nkwasà wa ngàsà dībà adi to, necìikalè nkwasà wa cilumbulwidi ne Nzambì wa cijì musòmbepù. “Mwaba ùdi . . . Piikala muntu mwakàne ùsùngidiibwa ne lutàtu, ngènzàmpèkààtù ne muntu mubì nebìikadile penyi?” Nànsha pàalwaYe mu matutu à butùmbi Bwèndè, mikùnà neyiteetè bwà kupeta kaaba kàà kusokomena. Netùshàadile penyi *twètù* aba, dībà adi?

Kaa, lukòkà alu ndwa mushinga mukolè,
Lùdì lùmvwijà mutòoke bu nêjè;
Ncyèna mumanyè mukwàbò mpokolo to,
Ànu Mashi à Yesù.

¹⁶⁷ Kaa, ekèlekèle, dileesònà kaayi’s wè! Mwadi mulubìdilé nànsha ùmwè! Ne Nkwasa Wendè wa butùmbi:

...ne Yèyè ùwva musòmbe pa Nkwasa Wendè wa butùmbi. (Yèyè kèna kàbidì kaaba aka to.)

168 Mpindyewu, aci ncintu cikwàbò, ncijaadiki cyà ne Èkèleeziyà mmwambwibwe kumpàla kwà Dikènga Dinène. Nwamònu anyi? Bwà cinyi? S'ki Yèyè ewu pa Nkwasa wa butùmbi mu Butùmbi, ne Èkèleeziyà ùkaadi muyè, ne pashiishe ke Dikènga dinène kulwadi.

169 Ntu misangu yònsò ànu mwambe ne mu matùkù à Noà, Noà ùkaavwa mu bwàtù kumpàla kwà dimata dyà mvùla dimwè kumatadi. Lotà ukaavwa mupatuke mu Sodomà kumpàla kwà kapyà kuponaku. Ne Èkèleeziyà neikale mu Butùmbi kumpàla kwà bómbe bwà mushindà kumatabù. Ncyà bushùwà, kumpàla kwà bómbe bwà mushindà kumatabù.

170 Wamba ne: “Kàdi mbishi bwà dyà kumpàla adi?” Dìwva pa bampàngaanù, kí mbeena Kilistò to.

171 Mpindyewu, mònaayi. Kaa! Yèyè wàkajikija mudimu Wèndè pa buloba ne Yèyè mwangàte Èkèleeziyà Wendè, nènkù mpindyewu Yèyè ùdi ùtùma cilumbulwidi. Bàà pa buloba bààkaMubènga, ne Yèyè wàkatùma cilumbulwidi Cyèndè. Yèyè ne Èkèleeziyà Wendè mbyè mu Butùmbi.

172 Yone, mu cisanga cyà Paatèmò mwàmwa, mubuulwidi wa èkèleeziyà maalu, ùwva cimfwànyì cyà Èkèleeziyà udi mwambwibwe mu Butùmbi ne: “Bandila kuulu eku!” Uleeja . . .

Wèwè udi wamba ne: “Ùwva uleeja Èkèleeziyà anyi?”

173 Bwà ewu yònsò udi umvwa Dìyì edi, Yone wàkamuleeja mpàla. Amen! Yone ùwva mwinyàmpalà wa Mashi à Yesù Kilistò, bujaadiki bwà Dìyì. Yèyè ùwva ntemu wa dibatiiza dyà Nyumà Mwimpè, ne bwobùmwè bwà pàà nkàayèndè ne Kilistò, ne yèyè wàkaleeja mpàla wa Èkèleeziyà mujimà; ne, mulùme ne mukàjì yònsò, nsongàalùme ne nsongàakàjì utukù mwitabùuje Kilistò ewu, muMwitabe pa bishimikidi bimwèbimwè, neàbìikidiibwe dīngà ditùkù ne: “Bandila kuulu eku!” bwà kwambwibwa kumpàla kwà Dikènga dinène. Vùlukàayi ne, cikondo cyà Dikènga dinène kí ncyanji kutwàdija to.

174 Eci ki ciikala cikondo, cyàtwàdija cilumbulwidi. Mpindyewu mbaleeja Yone ciikalà mwà kwenzeka paanyimà pàà cikondo cyà Èkèleeziyà. Nwamònu anyi? Nànkù, cìwva ncyòci aci.

175 Mpindyewu, mònaayi kàbidì mu mvensà mwi3, anyi mwi2: “Nkwasa wa butùmbi mutèeka mu Dyulu, ne Ewu udi musòmbe pa Nkwasa wa butùmbi.” Mpindyewu, Nyumà umwèumwè uvwa pa buloba awu awu, ùkaavwa muumuke ne muye mu Butùmbi, ne mwikàle musòmbe (Yesù umwèumwè udi neetù dilòlò edi awu) mu luse, ùwva muyè mu Butùmbi ne musòmbe pa Nkwasa wa butùmbi.

Ne ewu uvva musòmbe pa Nkwasa wa butùmbi ùwva ne mmwenekelu bu wa dibwe dyà yasàpà ne . . .

sardwànè: ne kùwwa mwanzankòngòlò munyùngùlùkile eku ne eku kwà nkwasa wa butùmbi, wà mufwànàngane ne diikala dyà mâyi à matàmbe matàmbe kutwila.

176 Nèngiikale mwà kwimanyika, bwalu kùdi bakwàbò bânà bèètù bàdi ne cyà kuyiisha.

Pàmwápa nengàngatè eci mu dindà, ànu kaaba aka. Nànku awu ne: “bwà kumwèka mufwànangane ne diikala dyà mâyi à matàmbe à matàmbe kutwila.” Kaa, ekèlekèle! Kaa!

Kùdi bantu mu myaba pàmwè ne yònsò,
 Beena myoyi yidi yònsò yilakuka kapyà
 (Kanwenaayiku banange aci anyi?)
 . . . Kapyà kàakapweka dyà Mpenta,
 Kàakabàkezulà ne kubàvwija bakezùke aku;
 Kaa, ki kulàkukaKù mu mwoyi wànyì eku,
 Butùmbi kùdi Dìnà Dyèndè!
 Ndi ne disànkà be mùndì mwà kwamba ne ndi
 umwe wabò.

177 Yone, mubiikidiibwe ne mubiikila kùdi Mukalenge Yesù, mulariibwe kùdi Nzambi kale wàwa bwà kumònaye dilwa dyà Mwànà wa muntu. Peetèlò, Yakòbò, ne Yone, ne bakwàbò biimane mwaba awu, pàakaakula Yesù naabò ne kwamba ne: “Kùdi bàmwè bàdi biimane mwab’ewu biikala kabàyi mwà kulabula lufù to too ne pàmònabo Mwànà wa muntu ùlwa.” Yèyè kàakambakù ne *bwònsò* bàvwa biimàne mwaba awu to, kàdi *bàmwè*. Ki kuyabò, matùkù makesè paanyimà pàà cyòci aci, ne kumònabo bulondyanganyi bwà dibìikà dyà ku lufù, ne dilwa dyà Mukalenge.

178 Eliyà ùvwa uleeja bansantu bafwè. . . Ndi njinga kwamba ne Mòsà, ne babiike ku lufù. Eliyà ùvwa uleeja musumbà wa batentèmunyiibwe awu. Vùlukàayi ne, Mòsà ùvwa wa kumpàla, ne pashiishe Eliyà. Eliyà ùvwa ne cyà kwikala mùsànjeela wa ditùkù dyà ndekeelu, uvwa ne cyà kufika ku dibìika dyà ku lufù ne musumbà wèndè. . . ùvwa mwà kulwa. . . èè, cìvwa mwà kufika ku Dyambwibwa, mùndì muswè kwamba. Mòsà wàkabweja dibìikà dyà ku lufù ne Eliyà wàkabweja kasumbù kàà Bambwibwe. Nènku, kwòko aku, bùbidì bwàbò bàvwa baleejìibwekù.

179 Ne paanyimà pàà katanci bàakamòna díbà adi, ne kumònabo, ne Peetèlò kwamba ne: “Twibake nrentà yisàtù. Bàmwè bàye mwinshì mwà mikenji, ne bàmwè bàye mwinshì mwà Eliyà, nènku tuyayai (bàmwè bàà kùdìbo) mùshindù ewu.”

180 Nènku pàcìvwabo ànu munkaci mwà kwakula apu, Dìyi kwakula dyàmbe ne: “Ewu m’Mwanàànyì munanga, Mutèlèjaayi.” Nènku pàakatàngilabo, kumònabo ànu Yesù, bintu byònsò bivwa byengùlùke mu Umwèpelè. Kaa, ne Yèyè nguvwa Bukènkè, Bulelèlè, Njila, Ciibi, Mwanzankòngòlò.

181 Kaa, mààlabà tudi ne dileesòna dinène, bu Mukalenge mwà kwanyisha. Mààlabà netwàngate “manyooka”; tudi twangata “dibwe dyà sardwàné,” bwà kumòna cidìdi dìleeja, didi ne mudimu kaayi. Nènku tуди twangata dyà—dyà—dyà “yasàpà” ne twangata kùdì...mabwe ònsò mashilèshilangane, ne twangacila ònsò aa ku Yèhezèkèle, kwalukila mu Genèsè, kwalukila too ne ku Bwàkabuulwibwà, kupweka too ne munkacinkacì mwà Bible, kuciswikakaja pàmwè, mabwe mashilèshilangàne aa ne meekala, ne bikwàbò. Ne pashiishe tudi twalukila naabi ànu buludì paanyimà ku aci bwà kumòna ní kî mbyòbì. Nwamònu anyi? Kumòna ní kî ndiikala dimwèdimwè adi ne byònsò, cintu ànu cìmwècìmwè aci. Ne Nyumà Mwimpè umweumwe awu, Nzambì umweumwe awu, uleeja bimanyinu bimwèbimwè abi, maalu à kukema àmwèàmwè awu, wenza cintu cìmwècìmwè aci ànu mwàkalayàYe!

182 Wàkambila Peetèlò, Yakòbò, ne Yone, ne bakwàbò biimàne mwaba awu, bayiidi Bèndè bwònsò abu, kwamba ne: “Bàmwè bàà kunùdi kabààkumòna lufù to too ne pààmònabo Mwànà wa muntu ùlwa mu Bukalenge Bwèndè.”

183 Wàmbila Yone, wàmba...Peetèlò kwamba ne: “NeWènzè nendè cinyi? Yèyè...Muntu awu—awu, cyàmufikila ncinyi?”

184 Yèyè ne: “Bwènú mbwèpì pùikalaye mwà kuMmòna ndwa?” Nènku Wàkamulekela ne mwoyi bwà kucimònayè's! Paanyimà pàà bakwàbò abu bamane kufwà ne bayè, Yone wàkashààla ne mwoyi bwà kumòna dilwa dyà Mukalenge didyànjila kumuleeja mu bukolè, bwalu bujimà abu bubangila ku cikondo cyèndè too ne ku dijika dyà Bilumbulwidi ne pàdì Bukalenge bwà bidimu cinunu bubanga. Yone wàkamòna kantu ne kantu kààcì kwònsò, ne ndekeelu wa Bukalenge bwà bidimu cinunu, ne mbangilu wa Cikondo cyà Bukalenge. Pa nànkù Yèyè ùtu ùshààla mukwàte ku Dìyì Dyèndè, kî mmwòmò anyi?

185 Netùcifùnda ku mvensà mwi2. Bu Mukalenge mwà kwanyisha, netùbangè ne mvensà mwi3 mu dindà.

Twinyikààyi mitù yètù.

186 Mbanganyi dilòlò edi, mu èkèleeziyà ewu, bàdì bamanyè, mwanèètù wa balùme, ne, (mwanèètù wa bakàji), bwà ne ùbùikidiibwe dìngà ditùkù, nànsha wèwè mudilongolole anyi to? Nànsha wèwè mudilongolole anyi to, ùbùikidiibwe bwà kutuutakeena ne Nzambì. Mpungi awu neàdile; ne pààdilayè, neàdile bwà kukupùisha, mu mwaba uwikala kuciyi kàbìdì ne mwoyi to ne uwikala mukengèshùbwe mu biina byà dyabùlù byà mu iferno pàmwàpa munda mwà miliyò yà bidimu, anyi necikubiile mu Dyulu bwà katuutakeena ne Bansantu bàà butùmbi.

187 Ànu mùdibi bushùwà ne Nzambì wàkalama Dìyì Dyèndè kùdì Peetèlò, Yakòbò, ne Yone; ànu mùdibi bushùwà ne Yèyè wàkaDilama kùdì Yone munanga awu, mubuuludi; ànu mùdibi

bushùwà ne Yéyè wàkalama mulayi Wèndè munda mwà bikondo byà èkèleeziyà; ncyà bushùwà ne Yéyè wàkalaya mu matùkù à ndekeelu aa ne Yéyè mmufwànyine kutùma mvùla mushiishe ne mufwànyine kwaluja Nyumà umwèumwè awu ùvwa pa buloba munda Mwèndè awu, Bukènkè nebùlwe mu cikondo cyà ibaamulòòlò bwà kuleeja Bukolè bùmwebùmwebè abu, bimanyinu bimwebimwebè abi, ne byònsò byàkenzàYe mu ditùkù Dyèndè abi Ùvwa mwà kubileeja cyàkàbìdi mu “Ciibi cyunzulula” mu ditùkù dyà ndekeelu.

¹⁸⁸ S’ki Cyòci eci! Tudi naaCì mpindyewu mene, Nyumà Mwimpè, Yesù Kilisti, umwèumwè awu makèlèlèlè, leelù, too ne kashidi. Nudi. . . Cìdi cinùyiisha, Cìdi cinùlongesha, Cìdi citeeta kunùfikisha ku dimòna cidi cimpè ne cibi. N’Nyumà Mwimpè Yéyè mwinè munkaci mwà kwakwila ku mishikù yà buntu, ùkwàcila mudimu munkaci mwà bantu, ùteeta bwà kuleeja luse ne ngàsà.

¹⁸⁹ Nènkù nwènù kanùyì banji kumupeta to, mu dilòòlò dyà Mulààdilu wà Cidimu Cipyacipyà eci ewu nudiku mwà kuswa bwà kwela byanza byènù muulu kùdi Nzambi ne kwamba ne: “Nzambi, ndekeleku ngàakidile Bukolè bùvwa pa Yone mubuuludi, bwà ne pambìkilabo ngàmwènèka kumpàla Kwèbè mu ditalala mwakenzaye” anyi? Juula cyanza cyèbè muulu. Nzambi àkubènèshè. Nzambi àkubènèshè. Ànu bwònsò mu èkèleeziyà mujimà. Nzambi ànùbènèshè. “Ndilongòlòlèku bwà kwandamuna ku mabìikila àànyì.”

¹⁹⁰ Taatù wetù wa mu Dyulu, bu mùdi Mulààdilu wà Cidimu Cipyacipyà eci. . . ànu mu mèbà matwè bu ku àbìdi mpindyewu nènkù nekùjike, nekùwikale cidimu cipyacipyà. Citùdi benze mu cidimu eci tukàadi bacyenze. Bintu byàbùngi bìndi mwenze, ne, ndi ndyumvwa bundù; ndi nyingalala bwà byòbi abi, Mukalenge.

¹⁹¹ Nènkù kùdi bintu byàbùngi bìndi mwènze bìdi bààbùngi bàà ku bàna bèètù kabàyi buumvwe. Bààbùngi bàà ku bàna bèètù bàdi mu budimi bwà bwambi kabèèna buumvwa ne mbwà cinyi ngaakabyenza to. Kàdi, Taatù, ngaakabyenza bwalu mvwa mulombòdiibwe bwà kubyenza. Ndi ndòmba, Taatù, bwà Wèwè kundekèdiku mfwishiiwbwè bundù bwà dilombodiibwa dyà mùshindù awu to. Kàdi ndomboleku, Mukalenge, bwà kutùngunuka ne kwenza ànu mùndi mulombodiibwe bwà kwenza amu. Nkwàcishèku, Nzambi, bwalu ndi nkeba ne meeji matòòke wònsò bwà kumanya diswa Dyèbè, bwà ngaamòna mwà kudyenza bwà kutwàla (bu Muwàkandeeja kukaadi bidimu byàbùngi pangàakashiya èkèleeziyà ewu) Dyàmpà dyà Mwoyi kùdi bantu bàà pa buloba. Pàngàakamòna mukùnà munène wa Dyàmpà awu, ne Bansantu bavwàdika bitòòke bàfùmina nseke ne nseke yònsò yà buloba bwà kudyà Dyàmpà dyà Mwoyi edi. Éyi Nzambi, ndekeleku—Éyi Nzambi, kundekèdiku, kumfikishiku ku dipanga kudiisha cisàmbà Dyàmpà dyà Mwoyi to.

192 Bènesha misùkà yìdì ne nzala yìdì myele byanza muulu ànu mpindyewu eyi. Bàdì bàkeba Mwoyi mutambidile. Ndi ndomba bwà Wèwè kubùja ne Nyumà Mwimpè, Mukalenge, yònsò wa kùdibo. Nzambì, enzàku nàнку. Bápèèshèku mabènesha. Kwàcishàku bânà bèètù, myaba yònsò.

193 Bènesàku bambi neetù bàdì bàdìlongolola bwà kubanda cyàkàbìdì, mpindewu mu tusunsa tukesè emu, bakwàbò nebiikale munkaci mwà kuyiisha. Tudi tulòmba bwà bwòbò kutùpa Dyàmpà dyà Mwoyi dilòlò edi, Taatù, bu mutwàtèèleja ne ntema yònsò ne kaneemu kònsò bwà kuumvwa Dìyì adi. Enzàku nàнку.

194 Tubènèsheku. Nè swàku bwà cidimu cipyacìpyà eci kucyàci ne ditèkemena dipyadipyà, citùtwàdila meeji mapyamàpyà, mabuulula mampyamàpyà, bukolè bupyabùpyà, kaa, bintu byònsò. Swàku bwà mabènesha Èbè ne milayi bìvwijiibwe bipyabipyà, cyàkàbìdì, Mukalenge. Tudi tudilàmbula, ne disambila dyètù, mu byanza Byèbè. Mu Dìna dyà Yesù Kilistò. Amen.

Twasàkidilaayi, bânà bèètù bàà balùme ne bàà bakàjì.

195 [Mwanèètù Neville ùdì wàkula ne: Ndi mutwìshùbwe ne tudi mwà kusànka bwònsò bwà ne katùvwa mu dilwijakaja to nànsha kakesè ne bafwànyìne kwikala bacyonkòmoke bwà kwikala batùngunuke ne kutèèleja Mwanèètù Branham mwab'ewu dilòlò edi utùtwadila mukenji ewu. Ne m'Mukenji wùdì wùtùkolesha ku mwoyi bwalu tudi bamanyè ne Nzambì ùdì munda Mwàwù. Amen.] Mukalenge àtumbè!

196 [Ne bwà cidiYe mwambè Yèyè ùdì ne bukolè bwà kucyènza mene too ne ku dilwa Dyèndè.] Èyowà. [Ne Yèyè neàcyenze, kì ng'ànu aci to, ndi misangu yàbùngì ngàmba aci. . . tutu twàmbara bantu misangu yàbùngì ne: “Udi witabuuja ne Yesù Kilistò ùdì mwà kukwondopa anyì?” nènku, mu bushùwà bwà bwalu, pa ciibidilu udi mwà kubàfikisha ku diciitaba. Kàdi bwalu bùdìku mbwà ne: “Udi witabuuja ne Yèyè neàkwondope *mpindyewu* anyì?”] Amen! [Dìbà adi bantu bàtu misangu mikwàbò bàmbara ne: “Èè, ncyèna mumanyè to.”]

197 [Inàbànza udi ufuma ku difwa ku lùpitaadi kwaka, mvwa muyemu bwà kumumòna, yèyè ne: “Mwanèètù wa bakàjì, ucidi ànu witabuuja ne Yesù ùdì ùsùngila anyì?”]

[Yèyè ne: “Èyowà, ndi ngiitabuuja.”]

[Mémè ne: “Udi witabuuja ne Yesù Kilistò ùdì wòndopa anyì?”]

[Yèyè ne: “Èyowà's, mukalenge, ndi ngiitabuuja.”]


[Mémè ne: “Udi witabuuja ne Yèyè ùdì ùkwondopa ànu mpindyewu mene anyì?”]

[Yèyè ne: “Aci ncyèna mumanyè to.”]

[Ki mêmè ne: “Mwanèètù wa bakàjì, udi mwà kucimanya bwalu mulayi wùdi bwèbè.”] Amen! [Amen. Yèyè ngudi mufile mulayi.]

¹⁹⁸ [Mpindiyewu, patwikala mwà kutèèleja mukwàbò wa ku bânà bèètù mwab’ewu. Tudi ne bavule lwà mu nyungulukilu emu ne eci. . . Mu Mulàadilu wà Cidimu Cipyacipyà emu, katwèna ne ndongamu kampànda mudyanjila kulongolola to, tudi ànu tudisangisha ne tulekela Nzambi ùkwàta mudimu mùdiYe ùlombola ne ùludika.] Amen! [Nènku nudi bamanyè’s, kukaadi kupite cikondo cile kacya twàtèèleja Mwanèètù Pat Tyler, ne kufila bujaadiki bwèndè anyi cyònsò cidì Mukalenge mutèèke pa mwoyi wèndè aci. Nènku netùlombè Mwanèètù Pat bwà kutwàlaye cyònsò cidì Nzambi mutèèke pa mwoyi wèndè aci.]

¹⁹⁹ [Kàdi kumpàla kwà kubandaye, mwanèètù kampànda mwímpè mwena Kilistò lwà paanyimà pààpa, Mwanèètù Randall Hyman, nènku yèyè ùdi mwab’ewu ne ùdi ne cipèèdì bwà kwimbila Mukalenge ne nudi bamanyè’s, ndi ànu mujinge bwà àmonàku mwà kukwàta mudimu ne cipèèdì aci bwà Butùmbi bwà Nzambi, pa nàнку néndòmbe Mwanèètù Randall ní ùdi mwà kubànda bwà kutwimbila. Úkaadiku mutwimbile musangu ùmwè anyi yìbidì mwab’ewu ne némulòmbe bwà kukwàta mudimu ne cipèèdì cyèndè kàbidì dilòlò edi bwà Mukalenge Yesù, bu yèyè mwà kuswa. Ní ùdikù mwà kulwa kutwimbila mpindiyewu. Yèyè ùdi ne nsongàalùme lwà paanyimà pààpa bàdiye uteeta bwà kubeja, kàdi pàmwàpa ùdi mwà kubàshiya mpindiyewu bwà kubànda apa bwà kutwimbila.]

²⁰⁰ [Pàdiye munkaci mwà kucyènza apu, tudi kàbidì ne Mwanèètù Kinder lwà paanyimà apa, mwanèètù munanga mwena Mpenta, tudi ne disànkà bwà bwalu bwèndè. Nènku tudi ne Mwanèètù J.T. Parnell paanyimà pààpa mwaba kampànda, ngeela meeji ne mmusòmbe ànu lwà paanyimà apa pambèlu pàà mulongo. Ne disànkà dikolè bwà bânà bèètù beena Kilistò bímpè bwònsò aba.] Beeler *kwàka*. [bânà bèètù bàà diitabuuja. Nènku twànjibi kumòna,] Mwanèètù Beeler udi paanyimà pààpa wàwa. [Mwanèètù Beeler udi paanyimà *apa*, yèyè pèndè. Eyowà. Mwanèètù Beeler ùdi kaaba aka ne . . . —Muf.] 

60-1231 Bwàkabuulwibwà, Nshapità Mwinâyì Citùpà I
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org